



序

詩人之心可爲境窮者必其見道未深積學未厚性情未能適其自然者也道在物無紛理學在己無疚心正其性情優游於百物之內故言自中出而其天常靜後之言者詞而已法得於意象非正則也義襲於聽聞非物原也感動於合離非和應也氣振於興會非定養也人生於憂樂無盡境凡遇有抵捍皆足以致慨唱故自古坎坷之境惟詩人遇之最多非牢騷幽憤則入於蹇傲禪寂以紆感懣自騷雅流傳以來惟晉陶泉明實能閑情於天繹其胸懷實與宋周邵諸人皆得其自然之樂者也少白潘先生學在自得以聖賢所言爲身事吾與之交得其平

序

生微矣少穎悟下筆輒千言簡齋袁大令思羅致之不可則約與諸子游詠人給數紙欲困之得題紙輒盡衆方含毫皆廢大令乃驚起不敢言先生自是亦常與名流自遠獨遊海內其於藝事皆學之其游見山川風俗得失常如讀書必思得其故故不爲舉子業而益精制藝不求仕宦而洞悉治理性愛山在蜀則居青城大西至山西居藐姑射在江介則居龍眠九華每所居從受業者屬塗當道訪之恒不遇有遇而交者則言必盡其短長邀之與居弗顧也自山西歸弟子致贖皆不納有數人潛與偕行賈金爲太夫人壽抵越而後發不可返乃各取少許同至家太夫人怒曰汝見僧以如來像丐市者乎吾固像也乃謝

而盡散之自是遇取予益競競養事畢遊燕趙郊至西山有素善姚駕部鏡塘者獨宦京師性狷而學同曾相約規得失勿隱故時一至城語終曰鏡塘病乃居城中鏡塘設亦病見車馬輒眩瞽遂不能去予身衰臥不謀簞瓢恒握書爐藥間稍勝步則獨吟原野人無識不識以詩文請正者必正語之遇名下士則告以實行爲首務其爲教凡一舉動言笑皆喻以道不必伏案展卷乃始講論居惟一襪破曰兩蔬食食有餘則以分人之困者弟子贄以金皆不納予扣其義則曰此吾病俗而過者也師於五倫譬物有匠君臣父子皆由以正今俗如市易故有懼焉曰然則朋友之饋非古誼乎又何却也曰此吾守已而不敢不

序

二

過者也常人過慾在慎其不可取者吾輩審慾在慎其可取不必取者學不自信故也曰然則力能自贍道必茹苦乃爾乎曰無德及物而資物以生心之所病則甚於身粗糲非苦境也凡其舉動每嚴已爲風俗慮者多如此以是日欣欣自予與相知無一日不見其自樂也詩之懷緒怡然得心以聲應之非所謂見道之深積學之厚性情各適其自然者耶內恬則外順如淵明周邵諸人天定於中不自知其樂之所至即使身處富貴其不以華盛移其澹泊者亦猶是矣亡兒福布從受業恐先生詩久且佚告予請梓而稿未定不果今春程春海司農與商刻先生詩文予因畢其願其詩蓋數千散失及自削去十之七存者

五卷其古文尤平生見學處司農梓之
道光十有六年歲次丙申七月既望年愚弟姚元之拜撰

序

三

林阜閒集

古今體詩卷一

初游草

古今體詩卷二

壯游草

古今體詩卷三

倦游草

古今體詩卷四

卧游草

古今體詩卷五

目錄

游戲餘草

林阜間集

會稽潘 詒少白

予詩皆成於遊當作詩時適情吐音如蟲鳥有聲不自已也偶爾錄之亦足見一生陟歷與讀書進退次第故不妨略存梗概然存不必多古人之言已得其至者吾何為焉舊稿因舟車屢失存者不過千首友人吳陶諸君錄作五集然可存者殆寡也因取校刪節每集存數十首略以見平生眉目而已

古今體詩卷一

初遊草

自庚戌至己巳存詩五十首

初游

卷一 初遊草

孤客蓬窗聞布穀誰家庭院熟合桃餘春意與猶糟粕川路晨昏如桔槔雨氣每停鍾阜屐江聲初聽廣陵濤嘗梅歌管誰相憶一樣風亭泥濁醪

鸚鵡洲

襄陽鳳凰暗不語何況鸚鵡愁中鳴鳴聲向人金丸至長鯨背樹非蓬瀛三春荆渚桃花落萬里漢江春水生日暮客帆南北去淒涼江月弔江聲

讀太白鸚鵡洲詩

太虛影下鸚鵡賦昔人淚濕鸚鵡洲後人花前呼鸚鵡愁滿楚江春水流詩成天上白玉闕酒醒人間黃鶴樓匡山片月留不

得雲安杜鵑回白頭

重經鸚鵡洲

隴山鸚鵡幕上語樽前反舌皆無聲網羅餘地近鼎俎何用雄
鳩羣噪鳴詞人例掌風月價苦調猶令溪山名鸚鵡有語不自
悔不鳴之鵝亦遭烹

黃鶴樓

千里秦淮月隨人黃鶴樓客心似江水日夜只東流

飲酒不勝杯勺主人遣歌扇索詩而罷

感歎中夜起愁來似春水雲情絮跡飛無因一聞東風逐桃李
少年青鬢危易皤總不能神仙將老何筆鋒魚蠹飛作胡蝶去

卷一 初遊草

一

且與公等對持金叵羅坐看烏兔轉滄海沃焦日夜東南波差
強人意惟有一杯酒壺公提壺須受錢神訶今有玉人揚青娥
笑頰婉婉紅粉渦與我並世各年少卽席妙舞翻風荷勸我盡
此酒足敵千年壽爲我歌一終我醉以帽觸屏風玉人呼儔主
人笑捲衫起我玉山倒玉山白倒我何傷糟邱葬地我故鄉人
生樂事瞥眼過疾於造父駕驕驕讀書一萬卷他日書腐墳土
黃所以自古能飲人惟恐夢醒聞炊梁我昔至蓬萊有人如君
長雲裳瓊瑤夏鳴璫貽我一卷食玉方擲之東海天夜光我至
芙蓉城人顏如朝暘世間安得有紅粧但見白髮悲秋霜造物
無多能偶爾生施媿世上小兒未見好顏色持此二物支清揚

我愛冰絲紈素手明月香爲君寫作雙鴛鴦紅衿翠羽枯滄桑
吁嗟美人兮杯中日月常杲杲眼前紅顏汝今好我欲夢隨碧
雲明月泛仙河明日醒來君勿老

至常德

櫓聲伊呵下巖谷一月江行傍山宿夜半泊船燈影亂曉見平
蕪際天綠城中居人十萬家城東酒樓多賣花樓頭笛聲人不
見楚南風物勝三巴

繫船

繫船最好柳條秋一樹西風繞茗甌斜日遠天山影好客程明
日到衡州

道中憩飲

風檻柳花迴遠塗滿笠灰天涯酤酒市花事餞春杯大白扇前
過小黃村裏來琤琮臨水影久立鸞鸞猜

曉發

孤鐸寒河外千家殘月中征裘瀛海露詩氣碧城虹曉色三川
遠關門一華雄浪遊輕遠陟天末又歸鴻

西湖春曉

樓上餘寒咽洞簫玉鱸晨氣互蘭椒春泥燕足濕羅幙小雨展
聲過畫橋開到海棠花有數預排湘簟夢無聊杭州自古消愁
地處處青帘有酒瓢

見落花

小院東風午日斜春光如酒不多賒是誰喚得紅顏住才是清
明又落花

空庭

空庭明秋光簾影闌幽室冉冉橘柚香西風滿落日

對酒

作詩正好自圈點飲酒不須人唱酬安期羨門狂裏遇蓬萊聞
風杯畔遊虛名與作塞翁馬好書且當庖丁牛吟肩醉眼綠無
縫冥鴻遠意點清秋

花前對酒

卷一 初遊草

四

金樽淥酒搖碧天不知杯中天底今何年春風悟人注此一杯
酒虛光浮漾千花旋旁人窺花謂無涖壺公壺中亦然矣時來
恰當花柳前知在何人酒杯底生時玉皇有要約付以百年看
花之間晷於今長看花玉皇謂我中無瑕益以辟塵之璧作耳
目瑩視淩聽惟見天地無紛謹百生共大宅萬古一終始孰先
形氣生終後川岳死無情如金石適用致劇砥人事塞四陲趨
程各千里吁嗟乎耀耀日月空中盪摩九十萬里生物婆娑古
有聖人其餘若何愚智並育真宰不訶生爲儒生吐絲若蛾不
能耕田鑿井而縈懷千載如因風而迴波紛紛橫日被絮食禾
洪荒至今皆爲蹉跎吁嗟乎造物不言旁縮手陳編日積高北

斗灰塵與珠玉同出案花口讀之未了白髮生不如花前惟飲
酒天上有酒星酌之得長生蠹魚三食美酒字能隨鴻鵠狷青
真春日遲遲可以舉杯今日不飲明日花稀引壺一醉六萬日
起視少壯皆可悲一日白頭人多似風花飛劉伶幕天思美睡
一奴荷鍤揮去之

夢作

銀河秋浪玉潺潺萬里天風笠影閒一片飛花過滄海碧山明
月是人間

蘭陽見菊花

遠塗得得過重陽小舍人家菊始黃馬上一年初注目帽簷十

卷一 初遊章

五

載不聞香秋繁東壁留瓶影矮紙西風捲墨光宛轉冰霜憶風
味人生只許少年狂

至襄河

櫓聲秋曉下衡湘千水千山荷氣香才到襄南見紅葉始知昨
日過重陽

池口

斜日池陽口微霞秋水紋輕橈三十里一路見匡君

湖口送客

握手蓬窗下江深風露寒來宵好明月君在九江看

坐酉溪岩上

碧山明月三百丈聽我朗誦秋風聲
文魔窮鬼相竊語人間何從來此生

東齋讀書

花影壓簾眠不起支頰玉窗讀秋水
窗中飛絮亂無聲窗外天光淨如紙
春影沉沉千萬里人間醴浸春風底
仙山花氣漲滄瀛酒國詩情韻桃李
傲吏園中有胡蝶穩睡春風忘甲子
生不慕鳳凰九萬而圖南又何況孤鶴
千年憶鄉里身如真宰無定住偶出閒
機作花蕊生香真色人共見清機來自
無何始世人
有書不善讀牽引微言盡詭譎晉人清
談漸駁雜方士鑿空生瘡痂一從丹經
援老氏此叟相隨入崎軌後人說仙更
如夢玉

卷一 初遊草

六

醴瓊漿對彼美招邀胡蝶亦情生栩栩
隨香識羅綺我用閒眸雪千古一脈閒
春落清几呼回胡蝶入澹蕩睡叟夢醒
揩眼喜瞿瞿千年得儔侶更有一言欲離
跂人不可憑虛長作浮雲生亦不必息情
塊若枯株死樽酒旁有書史紅杏花滿
簷晷日遲遲香靡靡無懷人彼何似

大堤曲

禮禮春光裏高低楊柳花孰知春風意
宛轉落誰家

讀曲歌和朱二作

烏篷畫紅檣青簾爲儂開天晴百花暖
多上越王臺
畫船蕩兩槩涇口見高樓遙看不分明
有人樓上頭

郎上梵蘿山逢儂山上來同行三四人怪我久徘徊
春蠶食荷根彼此纏綿絲纏綿在藕耳荷苦蓮心摧
蓮心各言苦雖苦不同心荷葉齊出水誰知根淺深

和人春日聞笛

桃李花前玉笛聲瓊纖朱蕊想輕盈此聲莫謾隨風去散作相思滿洛城

初夏

翠靑紫竹種千个雪白黃柑剝一雙花事紛紛不回首問看蜂子築晴窗

春日

卷一 初遊草

七

小紅墮片半塵灰歲歲春光去不回自解新詩賦楊柳便將閒恨對鶴鬢夢魂竟到故鄉去愁緒遠從盤古來少壯心情似花蕊一分春至一分開

襄陽道中

坦坦平平地靑靑白白天閒人未易老暇日鎮如年物外有風月塵中佳醉眠峴山羊杜輩何事復潛然

峽中夜破舟孤行山谷間雜詠

秋河皎皎澄碧天月色滿掌露盈盤濕衣飄飄隨風旋登高山兮遠望見萬里之茫然

月陰漸稀駸已入窮林刺刺風聲急絕壑猿號下正黑混沌天

海側足立鬼神啾啾相持泣冰襟久擁夢忽至夢到滄溟看初日鳥喚雲開曙光出

山高霜滑路流水晴霞照天樹光紫蒼煙沉沉千萬里怪峰如波低復起東西南北望相似整日無人山谷裏山迴日午聞江濤百年小劫過懽噫我欲乘槎泛青霄隨身只許詩酒瓢

前山似是有入人事側足陰厓望天地兩厓咫尺隔星源魚龍滿前使人悸高岩碎石垂昏籐碧花懸紅不可捫迢迢得句無紙筆朗吟獨與高天聽

天青青山峻峻枯樹遠近作風聲煙寒日淨磴道遠樹頭高處踞山亭槁葉滿徑非人經塵窗牢落不可憑磔磔雙鴿語深楹

卷一 初遊草

八

見人矯翼入青冥使我遠視欲孤騰深林一雲幾百里誰與裹糧關荆杞當時有人遺世立獨往獨來長不死迴山照耀日影黃厚地盤旋峰嶸起乃知洪荒太古國先有巢居後耒耜天高高下漠漠高風吹雲泊寥廓昔人今人遙唯諾杳杳遠呼誰其作開我萬古之心胸釋我百憂之束縛坐聞真宰語遠見象罔躍元氣淋漓濯詩骨此生必不委溝壑造物清我神不仙亦儕鶴夕陽澗壁明秋晴澗底伐木聞人行方知天上亦人世疏籬小舍有天氓古巷無四壁羽服顏如嬰見我遙指示招邀俱相驚攀蘿陟嶺爲君下玉壺芳酒爲我傾鴉鋤帶泥香云以鬪黃精山田如坻留我耕相約千載遊蓬瀛一笑出門去自古無長

生

巨掌鐵色青瑤稜銀河宛轉瀉瓊冰斐然玉聲喧高真約束淵
海中權繩千古萬古昏蘿痕天孫素機晞朝髮澡滌海鰲負山
骨梵宮古禪眉一尺滴滴銀壺聽秋月

小塘玉澈寒螢飛月光照路紅塵低魚龍舍我出大浪迴立天
末之虹霓迢迢青空見其表造物豪縱爲山襍結根直入滄海
底聳秀或傍星辰梯傾瀉胸中九雲夢脫略世事藐鵬鯢虎豹
掉頭不敢獷魑魅扶人過幽莽崑崙元圃入冰鏡羣仙羽衣集
金掌飄飄孤影望九垓清詩遠韻問魁台仄厓俯駭紅棧斷虛
谷忽裂蒼煙開碧光欽歆河漢轉暗影笑兀罔巒來清夜如年

卷一 初遊草

九

不可曙寰中靜月相徘徊不知語聲是何物但見古井生莓苔
或如白衣起幽蔓子子人立沒陰隈我生曠步洵壯哉盧敖若
士豈我儕萬象出沒積氣內百年人事青芒鞋山巔牖下皆正
命美酒誰及寒潭灰江河到海我尙在藐爾坎壈安足摧我懷

沙市檢詩稿憶大鳳灘破舟

此西溪出辰溪路也前破舟在三峽

去年入蜀自荊州巫山碧玉齊春愁目送峨眉自厓返衝雪更
入青城遊今年出蜀自二酉武陵桃源沾春酒擘溪行盡四千
里黔雨滇雲接荊口千山萬山別我去極目斜陽際煙樹上有
不盡之青天下有無心之閒鷺一葉飄然寄滄海始覺人間是
平路捫星騎漢初何好豪狂喜得江山助一囊黛色翠欲滴快

眼奇情鑄成句欲攜盼影誇江東萬里持歸若耶渡大鳳灘前
夜泊船朗吟正得逍遙趣水中明月漲千尺滄桑劫到裝詩瓠
夢見魚龍愁紙貴商略傳抄蜀都賦賦裏高唐十二鬟披圖欲
鼓黃金鑄我家越溪山固好故是西施畫眉處蘭亭禹穴掃修
眉佇待霜豪撥煙霧可憐詩癡一味癡有山無山俱作詩蜀詩
頗作劍器舞越詩請看芙蓉姿

步蘇堤

日午芳草遠柳花隨人飛東風無定住遊子更忘機佳日對淥
酒百年如朱徽春來視人世但覺盡芳菲

山居

卷一 初遊草

十

種松日已夕偃息松陰間明月上流泉靜光臨碧山山靜清籟
發空澗生春寒閒門掩碧天樂心來有端自古田舍中常得天
地寬清風一片石坐嘯可百年松聲月中作瑤琴寂無弦

與人泛舟風大作

遙空無雲天色秀大江無風波色皺晴川暖日浮釣絲花落春
殘詩思瘦青山隔岸如幽人水涯靜立整綸巾照人竹樹翠欲
語對之聲欬落清芬一杯渡春水近山碧瀾瀾中流擊楫欲上
天下視輕雲數魚尾大聲震撼帆檣間江中雲影皆飛翻環天
海氣立作堵舟人驚眸秋電寒將軍間行無寸刃敵騎萬馬環
山屯長繩繫天不可援兩岸人觀壁上戰鄙人狂懷於此頗有

用險語故作驚波漩揭開白玉壺酒香隨風漫江中魚龍豈足
與共醉且灌吟唇作波瀾馮夷怒力只足倒泰山其技何能撼
吾硯昔人言遠遊高舉凌景風銀河一波千萬里槎頭鶴背殊
從容使我作神仙我豈不上天行虛空安能屈縮偃仰如蜺無
足棲枯蓬海若望天根海水猶有垠墨池之水不濡軌能通干
古萬古無涯津有時風濤起顛倒鯢鵬作兒戲有時纖浪平太
始無象測虛盈餘波猶能灌仙佛羣虛百妄亦染涓連生酒邊
睨萬事不足擬秋豪眼角常見天寥寥卽唳九折未必覆吾轍
几席偃卧何必無風濤處險當於未險時已經險處愁則癡怪
風奇浪自足辨詩料可惜酒盡風力亦漸微同舟五人驚定指
回天更綠一詩換得山花歸

過鑑湖人家紀事四首

曲渚綠莎岸春巖擁白雲竹根遺釣具花影鬧鵝羣地近西施
里山傳東晉文主人移酒艇相與泛斜曛

泛艇春溪緩綠花窈窕行鷺鷥窺影立荷菱戴萍生桐墅墮陰
奕山田聽瀑耕暮歸樓有月幾處讀書聲

樓靜月光永山幽世境深巖泉傾遠耳松影墮涼琴酌酒有佳
致聞香多妙心樵風雲出岫花氣入微陰

酒醒陰晴異歸篷信水流小村垂暮雨江樹擁春舟夢繞柯山
寺詩成江令樓天晴花事了喜得剡溪遊

乍行大江

初客孤舟卧人聲動曉光星樓催戍角岸纜拽晨霜風起天根
白雲陰江氣黃蕭蕭望人世千里入蒼茫

塔見雲藏縣鷗飛水貼天長年呼遠客高浪並鄰船對牖陳圖
史浮生紆食眠廣川須有際斜日望人煙

磯樹明霞近竿檣夕岸喧登臨先辨句蒼莽待開樽魚市更籌
早龍祠星斗尊低篷傍高艦竟夕大波奔

南北東西話相依各見招占風鄰旆動覓酒岸燈搖海氣遙坤

軸天隅認斗杓遠塗知世曠人事共寥寥

卷一 初遊草

七

林阜間集

會稽潘 諮少白

古今體詩卷二

壯遊草

自庚午至己卯
存詩六十首

觀仙山圖秀傑無名誌

六鰲背上洪厓宅何異螭螭眉曉間誰借崑崙消白晝却教滄
海有紅顏古人夢裏東瀛月今日樽前西壁山都是文人荒渺
債無端仙佛動機關

晉陽道中雜詠答陳仁山

涼風厲素節寒光動征衣草木被原臯清露隨陽晞高天亦何
涯榮率理則齊羣生作華實萬態迭新萎金石古云堅糜淪淪

卷二 壯遊草

光輝日月去已遠悵然攬萑菲徘徊千載中獨立安所歸

桔槔俯仰躬輓轡長抑昂止水作流波東西行何常去去各有
適指向無隅方極勢務汗漫萬折趨滌洋回視澗谷中天影沉
秋光動靜一分岐末路周八荒所以江河流自古多堤防補苴
雖云勞可以無懷襄車輪左右轉大道在康莊

深堂佇秋月蘭露濡我裳和絃陳橫琴風靜徽音香何年孫桐
枝匠器成宮商昔聞古帝舜賡詠儀鳳凰雅製今不渝願以近
朝陽客致千金書報之以芬芳乘風發妙蘊遠意不敢藏根在
龍門山香滿君子堂

姑射有仙人吟風飲朝露風露誠不煩不如滋耕獲與人作網

緇食德亦已裕萬物各有役愚智相依附禹稷播艱鮮巢許得
含哺所以康衢人作息竭朝暮

來者無盡時往者紛已過人生千古內粒粟浮滄波賢愚均歲
月茫茫同山阿朝日照大衢車塵何嗟峨馬蹄竟長道古往今
更多是中豈無物可以固天和徒見採藥人高塚齊岷嶓去
白日暮盛顏易爲皤黃金鑄景光烈名排山河

驅馬陟高坂攬衣望瀛洲曙光自天來高蒼浮清秋四極漫渺
渺白日鳴義騶百生何茫茫動植盈山邱太空育天地生物不
自由消息竭化機飲啄有餘求願言三神山化作良田疇白鹿
爲人耕鳳凰爲人耨蓬萊在中陸弱水容方舟

卷二 壯遊草

二

有鳥名希有背似崑崙山仙人軼景光乘之遊汗漫元氣環四
極風聲繞兩翰曠覽星辰旁息駕蓬壺間靈山集羣真樓閣闐
雲端丹霞冠玉樹瓊流臨芳蘭清歌出朱唇金樽倚人顏卷然
顧我笑天風啟雲關飛梁接星衢遙望不能攀澄心有太古至
樂在人寰

綿綿車馬道磔磔溝上榛尺度盡株柯餘篠猶支皴萬物苟適
用鮮能完其真材則狗磨礪不材付芻薪金石遞新故矧乃斧
與斤至靜有妙年冰雪遠灰塵崑山千載木不爭榛蕪春

疏疏楊柳樹灑灑涼風發碧天皎秋河清溪濯明月千載自曠
朗古心無纖缺置身百歲中悠悠以華髮

西風吹遊子落日渡河汾長川縱遠眸青天圍白雲舟中平原
客猶說平原君門下三千人珠履繡錯紋斂租供飲饌豪舉多
功勲田文一飯魚能使馮生醺諒哉魯仲連頗亦不能羣
耳目無明聰循名成愛嗔積習鑄妍蚩千載澆吻唇古人卧蓬
下修譽揚清塵巾墊亦何事高亭猶貞珉名士一張頤什伯效
其響俗慕浮如雲娥眉何由真凜然語儕輩重息正我巾

春風吹青鬢好花屬吟觴芬菲各不猜及辰霏光香壺中曠日
月人壽悠且長組織天孫機燦然成文章壯心在豪舉顧影良
白芳逝波渝華景飄蓬轉冰霜儕身淳悶中萬古始茫茫生無
一物材何以恣徜徉

卷二 壯遊草

道旁有佳樹顏色既已齊繁英間秀實無人自芬菲金玉爲筐箱
千里貽所思美質爲世用豈不生光輝曠世毓奇芳恒在千尋
枝人無凌雲梯中道空徘徊

種瓜得甘實良圃藏其犀華腴有時盡心與來茲期寂寞分寸
內存發在幾微衆人艷芳華枯荜踐爲泥氤氳天地根淳默爲
之基

熟蘭不崇朝燦蓬時亦燼兩身各灰塵薰香人所信世物無久
質真氣非可奮緬懷古陳人骸朽光逾潤當其卧窮廬耿耿不
敢瞬蓬在榛墟間蘭在金博山要使香意固墟鼎安足論

畫鑑湖讀書圖貽西泉

秋山皎然明秀骨樹根獨吟風窸窣長空日落天似水蓬壺闌
風上孤月蓬萊正值會稽東仙人墓樹花濛濛不恨齒牙欲落
頭欲童但恨耳聞日見頽然而瞽聾丈夫讀書一萬卷嶽嶽自
置今古中高樓風絮搔鬢天間地曠遂龍鍾文章亦不用鳴
九縣但得清泉白石安此硯珥貂碧落長不死不敵花前擁千
卷石帆之山下有吾廬門前流水中有游魚暮歸坐釣晨興荷
鋤落花盈酒杯種秫爲屠酥泉乎泉乎與汝治安之策農里之
言慎守勿失吾歸鑑湖長讀書

曝書

一樣春風裏何人雲漢翔年華隨鳥跡詩句補牛毛名士不如

卷二 壯遊草

四

餅古人焉用糟花陰羅萬古自覺蠹魚豪

對書

蜀遊爲覓少陵詩乘興閒尋綠荔支兩岸清猿經灩澦三峰積
雪望峨眉一邱未必了人事千載何能不自疑春晝如年擁書
坐藐姑山色又支頤

園中

園雪初消飯有蔬春風綠到社前樗世間都是因循錯多少閒
人好讀書

秋稼

野性樂農稼悵懷觀秋原秋氣明高林黃葉窸深村山畦爽塏

地井吠靜不煩八月菽墮苞九月稻生孫刈穫亦已時霜晴衫笠暄伯亞並里居兒稚互呼奔老翁左右揮挂笠修樹根青黃滿溝塍愉氣漲乾坤縱橫見雲水杳窅趨林樊落日明閭樓暮色涵柴門烏鳥逐牛飛雞鶩迎人喧少婦呼具酤逖然羅瓶盆炊煙起籬末燈影照盤殮衆星蔭碧天遠舍沉微痕槭槭楓樹外黯黯遊子魂驅車望前途夜寒山霧昏何時坐田間觀穫對清樽

四松

孔明廟前無古柏

少陵古柏行在夔州此則所謂錦官城外柏森森者也今皆無之

公之草堂

無四松錦官城外無石笋錦官城上無芙蓉長江滾滾來不已

卷一 壯遊草

五

故物莽莽去無踪千年淵海幾陵谷羲和驅日行躡躡區區騷雅支儻忽以精衛力補溟洪當時杜陵白髮翁搔首獨立向煙烽抗懷無地安日月計藉草木乞天工倒生豈非雨露物憔悴正與風塵通周防視力護振撥如人離立期蒼穹大夏養材貴初質倉猝一日難爲功用心至苦樂事少北征以後皆悲風許身稷契似躑躅凌傲楚些猶從容蜀都重到陰嶺沮長蛇白齒高龍從涼秋風雨揭却屋一生旋轉隨枯蓬草堂今在千花中時平四海春融融諸天千佛得庇蔭豈知願力由孤窮後人訪古澗滄海一樹一石等鐘鏞海棠三月開濛濛照江千步如晴虹當時歲寒同志節勁心只許冰霜逢陽春已至衆芳笑甘苦

難爲問鴻濛不知何年作梁棟或化雲氣隨飛龍得失於物亦
何定但有愛惜在人胸三春馳驟騁華好千載寂寞誰芳穠蠶
叢極天輪囷樹未遇此老空龍蔥澆花溪水日夜東江頭古木
繫遊驄逍遙觀物足感慨百年有盡吾何從

漢槐

此在介休郭林宗墓
又一在太原城北

林宗墓前有古槐遠塗數舍見崔巍久共金莖語秋露始見樓
桑茁春雷風雲翕霍二千載鄧林生死幾榮萎東溟浮筠光彩
遠荆南冥靈風雪摧此木昂藏望霄漢厚地聳秀青天垂人言
林宗手植此矯矯萬古揚清輝洵乎不朽皆有託亦汝勁固能
自爲修士風流尙如此何況至道光台魁雲風杏雨敞天地岱

卷二 壯遊草

六

松雍柞秀苔莓我來驅車過樹側緣陰如山搖廣陌長風瀕洞
天黛色闌岩巉壑窺正黑下疑根泉通滄海上恐柯南有仙國
株圍十丈盤數畝寄生如輪過百尺織女中宵拂素機孤鶴青
冥回羽翼偃寒風塵宦道旁世無斤斧豈汝力窮山穹谷求大
斲班輪旁卧不敢憶卽今已非梁棟用傲兀冰霜不自惜孰云
剪伐方爲材從容只信乾坤息太原古樹今亦存欲爭造化申
網緼棲遲籬落秀塗巷九原無處依龍門

客有載書過者許借讀一月未盡數卷而目幾眇嘻學問
之道止於此矣

嘻我生豈復待龜蓍茫茫青冥固有涯躑躅山海數十載端與

來者評瑕玼冰霜如飴死不悔味古恥獨言寒饑天高海深愚
公老一隙光耿莫窮窺昨者梳頭見白髮慷慨俯鏡久自危詎
知疾疢起頰洞百鬼亂瞰干魔嬉兩眸墮身入雲霧顛倒昏曉
失須彌奪我光曜向昏暮立以蠢骨居以尸可憐瞬息涵太古
刮垢觀理思前徽笑訕如墻益默固知者竊憫疑者非老天賦
形付知覺豈願一物成聾癡平生作詩無愁字今日仰歎始心
悲與物混沌亦何靳食粟五十慚鬚眉雖言不盲有心在朗照
已與聰明睽故交致書問何藥令人旁讀揮漣沍古聞朋友相
吊哭此豈細故獨容儀鮮民不學誠我罪桑榆補救望幾希聖
賢所許豈欺我要在默默驗幾微詮磨附鳳吾豈敢敲金戛玉

卷二壯遊詩

七

亦不爲未甘懶惰廢書卧強近針石追衰羸明知詩書不復覩
猶戒檢貯無污遺生無子孫欲誰授抱殘守缺今可知世間樂
事固多術恐使苦士惕肩仔天其以我試頓挫投以坎蹇觀所
持人言學問非人力胡不美服含金卮此言良善我已老執鞭
恐爲黔婁嗤二氏求詮忘四大彼悞轍者猶能斯使我聞道得
默識今死非天奚足辭殷勤作詩付徒侶我偶然耳慎勿疑

呂雪村司馬惠裝

雪村吾故交官亦勤且寬未老山中居卓然有遠天吟梅踏風
霰知我衣已寒千里走錦字美意暄山川裘綺曜一堂祁寒爲
熙妍拭几鋪皎雪臨風泛輕煙着此行看山東帶鬚眉端慨然

憶少壯錦瑟馳華年妄心息騰靜意樂孤單
懸鶉曝簷日坐覺天地閒生無益於人捫心求所安
華好易感際其機如弧弦審括杜所萌始在分寸間
煌煌車馬章豈任吟詩肩朋友共衣裘古道照中丹
取予各有適一介義所存今君豈能廢賣山坐無錢
令子雖能養時君長子為榆次令祿餘良亦難官居一縷絲蠶婦朝不餐平生不耕食高咏愧伐檀况以黔婁餘濟我冰雪酸再拜返君裘短褐稱我顏願君恢綺謨粟水舞萊斑貧人惟贈言硜硜慚高賢

陳君鶴泉饋金

兩日得一炊吟筆猶能扛敢煩東海使勤劬決西江飛鴻舍遠

卷一 壯遊草

八

書雅致南金雙書云慕麥舟況復君子窮高誼薄千里傾蓋及飛蓬奈何細人心秋蛩慣寒風無德當慷慨捧書轉忡忡吾其有貪實芥蒂高賢胸鳳凰含餘食來哺信天翁吾少喜苟難意氣如激瀧萬金揮道路一笑不爲功豈不驚流俗奇節非由中諒哉仁人言施與由近躬前車九折臂敢爲他山攻再拜返百朋晨炊幸已春何以報泛愛因風附蘭苕

目愈但不能正書及書看書亦鈍

學問少一能人事多一欠矧我少壯積陰悔垂老何堪事安晏大哉人身兩眸子古今所得混沌間綠風內障一日起造化蒼茫失真面天工曲宥返光影勗令前修示薄譴 太平日月得

視息四體髮膚免瞽眩神光黯慘終覺衰未讀新書略可見握
管乍書徑寸字久廢得視喜無倦少吾先子註本草旁令挑燈
拂几硯豈知哀哀罔極心投暮遊魂脫憂患晴窗落日輕紗紅
欣對簷樹臨清風困極方知身世樂鶉衣蔬食皆從容鬢鬢繁
粲危成翁餘生一息總天功不知何處好山水尙待屐齒留泥
鴻此生風月須斟酌逝川向海日夜東古人要約昏未了但願
窮餓莫瞽朝作能耕暮能汲餘者何足芥人胸天之宥我豈
無以要使故紙鳴秋虫故人奪書令對酒開簾明月生寒松

晚自黃村歸

暮色猶辨樹柴門行旅歸下車拂塵衣宿鳥滿高枝少壯去我

卷二 壯遊草

九

馳老懷憺無機終日行一郵僕馬俱已疲夙敦山水好不言登
陟疲百年良苦辛日夕思所依燈火啟中堂初月在東扉靄然
一尊酒相對無是非村靜遠柝動壺傾顏輝輝大塗遠車聲夢
殘猶未稀

初春二日同人登高

老境浮懷淨人間樂事多朝來杯酒醒春日滿山河

送酒至獨酌

坐擁羣編抵百城硯旁更列兩三罍大杯映樹綠無底小鳥入
花紅有聲百種名香薰抱膝數家真籟勸班荆閒身不是花前
醉須向名山白髮生

見西山落花詩復和三首

名花與風雨自古若爲期蘭蕙不長好芬菲人所思香從元氣
綻佩自昔人貽斯意無霜雪春風自爾爲

春色如春酒去來人醉醒樓臺一意綠天地兩眸青佳思出羅
綺閒情觀晦暝送春猶酒渴酩酊抱空瓶

百曰春風事滄桑曰曰更紅英一片墮白髮幾人生都在韶光
裏各行朝暮程青春如不老真宰更忘情

沿堤

孤影坐簷曰閉門白髮生雨晴沿柳色日暮有秋聲

步西城

卷二壯遊草

十

落日出郭門獨遊成逍遙衣食吾何知未死且嬉遨青天八九
屋疏風吟秋條徒倚寒色裏曠望正寥寥靜因不在山會意步
林臯至味難名言遠心寂相招登陟喜有具車馬徒爲勞明月
在城頭歸吟昂青霄生逢天地閒頽然憫王喬

自晉陽過榆次

落照古營州青天雪盡頭羣山飛葉盡孤客鬢毛秋遠色燈隨
樹寒聲角滿樓魯連江海跡此地十年留

過候馬驛

花事去悠悠閒人已白頭殘春山郭路微雨酒家樓漫迹風煙
換生涯吟醉休古今何處盡長曰且閒遊

江上夜起

靜裏棹聲遠杳杳極寒煙落月明江岸霜蘆有釣船

暮行

空谷夜無月霜林露寺鐙誰憐中野客安穩是山僧

舟中曉起

夢纜動寒枕岸聲集霜履曉天萬里色孤篷在葭葦晨鐘颺江樓初霞浣秋水靜中羣動在曠境偶堪指雙帆遙不動漸小過山尾知彼舟中人篷窗得何視共在一境內會適各千里迢迢古今客默默青真底前徽儼相晤可望不可企渺然托江海吟覽見尺咫一生性所適髮白亦已耳倦遊行自緩舟子飯方已

卷二 壯遊草

七

投篙入深碧波光灩灩江塘滿朝日人行鷺鷥起

遠葦

遠葦無人水自煙鷺鷥拳立釣魚船眼花便作漁翁看都在江湖自得天

夜宿山寺曉起

初醒夢未斷竹院聞茶煙夜來碧山雨開門見流泉

趙地舊遊自江南歸寄詩相問次韻奉答

浪跡如行南北舟年來倍覺歲時道人經江海鬢華白書到關

山草木秋每飯未嘗忘鉅鹿計程應得過揚州春來誰共南園

醉我擬持竿狎海鷗

水上偶吟

釣翁與鷗鷺各自用機心妙得忘魚意閒因觀水吟天寒岸樹
遠月上荻花深少與湖山約忘懷直到今

寒夜遠步

秋高野何曠團月上平煙天機隔塵事登覽心悠然夜寒車馬
靜霜氣橫中田寒臯步木葉夜闌天影圓孤鴻聽時遠村杳靜
相傳田家門掩早作苦昏已眠一生看滿月未及東林巔回望
城中衢燈火明通屢勞逸雖自殊世事各營煎寥寥千載內靜
者豈遽賢委身乘物化不付形神牽獨尋幽徑歸孤月在我先
竹陰過窗牖對酒仍開編讀書不求名美意忘歲年此樂誰與

共自得非能詮

卷一 壯遊草

七

致書諸友夜不寐

風葉撲窗紙秋聲枕上聞夜涼近重九佳會又離羣

窗前小杏歌

牕前小杏長似人獨立倩盼矜陽春窺窗欲語如有顰紅玉暈
頰脂蹙眉窗中有客隱几卧花片亂打烏角巾及時努力揩睡
纈東風戒旦已駢駢客懷正惡慨然歎自古花好無十旬老夫
十二學綺語以花作性香作因醉眠夢醒詩在口酒痕花影共
一身窮山跨海訪絕艷仙姿玉韻難名論四十年來看花眼漸
覺兩睫生紋皺卽今花落人亦老閉戶長與枯株親東家築園

我方卍珠琲索聘司花神西家瑤欄金玉益娉婷別隊香分羣
清樽豪管笑語溢戶外春意動氤氳綠陰生子復生孫名園花
賤摧爲薪道旁狼藉論擔賣我攜汝作貧居鄰酒瀾枯涸文氣
蟄牀下雙屐無泥痕聊因小朶寄春概如見兒稚能笑頰春風
以慳得憐惜香意益動花間醇自覺天底亦大好顧汝欲落生
悲辛百年看汝復幾晨後者以汝爲灰塵豪門桃李只奴僕絕
艷豈必庸眸珍去年紛紛各分散一日繞樹無數巡鬢眉老去
情故在欲借壺嶠居紅裙作詩聊復書汝紳風雨慎惜同心芬
窗前小杏默無語春波杳杳生白蘋

高城壁桑乾晴影雙浮圖不知何年寺傑構青天隅幽居白日

卷一 壯遊草

三

暇吟步隨榛蕪慨見古佛塲坵垣橫煙墟頽閣有零椽諸天但
埃塗雄碑立牢落低徊捫苔膚南者智度寺北寺名雲居起伏
一塵裏大道瓦礫俱惟見兩塔存廢磴撐羣鳥烈風振星漢神
功相支扶仰視不可登落日晃稜觚欲問勝果因草屋無緇徒
當時須彌山朗映冰玉壺創建自五季十方競奔趨塔鈴雙燭
龍含照明月珠於今輪囷材足庇千人廬巨鍾卧草棘羣兒踞
相呼因之悟物理萬事可長吁佛視旃與檀何殊榛與樗

送人至湖北

晴郊三月桃李語春水無聲向荆渚風亭落日照離帆主人奉

觴勸客舉平生讀書聲遏空高卧田園殊自許孤雲在山須有用他年出作何方雨好官今是勸農使萬戶豳歌逐前簿大江以南春正深花落閒疇叫桑扈君今努力飲此酒去與農人作歌舞天涯會面安可知萬里相思共箋楮君思我寄語清潭之閒鷗我思君問訊汀洲之芳杜

高樓篇

悠悠遠行道清瘁百草繁星照落月行人何太早高樓臨大堤卧聞客馬嘶青天挂長路客馬何當羈洛陽三月花城門來去車車中看花客多道是天涯鳥啼苑中樹含花入雲去人生鄉里中壯懷逐風翥樓船下江關海波大如山庶亦無饑渴封侯須早還禾田春風起種黍釀成醅金鞍垂兩鐙不如負耒耜夢中聞人行嚴冰歷羊腸行人馬上歎居人思故鄉

雞聲行

兒年四五雙角了五更聽雞索梨樞人事正如初醞麴繡帳影亘紅燭花自識之無矜了了聞雞怕見東窗杲先生未起童子驕門外疏風立霜曉年十五六狂欲騫雞鳴刻燭吟正謹人事如花春漸放不信人非長少年神仙富貴隨波漩醉醒滄海有時岸水流花謝始識愁二十聞雞漸興歎浮生自是入蒼茫略如鴻鵠嬉風霜荒雞遠號殘月上馬頭夜霧關山蒼遠塗朝暮易成歲未知白髮何時至十年野店聽雞聲人事自殊愁更異

長安故人寒擁裘聽雞夜半起鳴騶山中故人眠對雪聽雞夜
半起飯牛同是當年枕上聲他人又作幾般聽人人自聽人不
解當局遷感難爲情扁舟永夜鄰船語天影微茫下前渚人事
今如水蓬雞鳴解纜瀟湘雨

秋懷用昌黎韻

秋樹連山原亭牖書字暗澄目無他用漸老有餘憾古人不可
覲高層慄一瞰道心辟百塵堅壁不如淡力求疏水樂僅免困
窮濫夸父行望天瞬息不容暫行到滄海盡遙天不可纜此心
黠黠處豕亥不自勘挹注今古中所期盈瓶甌

食筭用山谷韻

卷二 壯遊草

五

種汝作佳竹不令爲佳菜泥塗無堅節出色乃自賣鮮新露至
味淋漓洩真宰一點無俗氣倔強終不壞有生吟嚼綠夙分詩
酒債結廬納山翠風雨共針芥出門隨草木之子猶狷介恐我
遠漸老齒落不能嚼千里走稚子對箸問咄噫我能食無肉故
墅誓勿采

種菜

微雲抹修嶺冬温如花晨小窗映晴樹熙然樂有身羣書旣羅
列紙硯亦具陳蘊藉多哲工千載若比鄰簷鳥時一語晝永睡
思親出門望農疇蔬麥滿河脣父老曝背言時和甲折勻雖逢
雨露力人事在及辰樂歲無饑寒勞身使心馴盲哉太古言世

猶存斯民感彼歸荷鋤小園理荒榛離披植菘韭灌汲頻踞伸
明年桃李花應讓田家春

曉行

霜風吹靜月寒空覆煙原孤影馬上去蕭蕭疏葦根迢迢萬籟
初衆化如水源至清初不動少進乃潺湲高樓入城隅遙聞歌
笑喧搖搖紅燭前悠悠黃金罇此間一杯酒天地如爐温

題石效孟

猿鶴不解吟可引爲知音眞音不以籟靜坐但開襟漫漫籊籊
花自古開到今托根遠剪伐冰雪亦成陰松門蒼翠風月泉清
冷琴勞生一到此可息車馬心却問山中人頗厭山居深

題房山賈島墓

有序并辨

普州參軍墓無銘吟魂風雨寄蜀陁岳陽池水今陂苒長江寒
流漾疏星過宣當塗聚游舫擬與十詠爭娉婷桑乾故屋存菴
名石樓祠宇儼垣楹祠中古墓荒疇平紳則封樹雍爲瑩長沙
奇童時所傾作詩立石軋霄崢蜀山煙霧呼不醒于載誰復哀
雋靈廟龕高視揚芳清鬢長至帶我冠纓過者拜揖吟有聲宛
見京兆潮陽型閩仙汝鬼亦錚錚風林芳馥雜蕪蘅白曰欲夕
明疏局長天遠碧微霞生西山刻劃秋骨青道人問字袖黃庭
折松烹茶滌紺罌酌君清泉勝醪醕君詩正宜啜茗聽幽桐變
微寄滄溟苦憑霜鐙敲月明當時意氣諸豪英黃壚漠漠聚寒

螢窮愁亦足豁
瞽盲挽弓五石抵一丁
東西南北飄枯萍
古人長卧今人爭
文章李杜主齊盟
酒杯停處花如屏
青山明月照林亭
未陽西風橫荒荆

憑欄

露下青山木葉乾
高秋爽氣極天寬
琴牀風雨鞠通老
客枕星霜胡蝶寒
探篋多詩農有歲
種花見蕊未成丹
少時未肯乘風去
恐作神仙亦寡歡

江村初夏

水榭波光拂檻迴
新蛙撲絮水萍開
殘花酒謝提壺勸
古墨書因紈扇催
牛背笛聲浮澗去
潭心雲影過橋來
傍林自掃新篁

卷一 壯遊草

七

籊相取長竿作釣材

舟行

千山盤折下江沱
地近湖湘樓影多
小雨穩容三日睡
遠塗初辦一程酤
魏收狂似驚胡蝶
劉書文如疥駱駝
南去衡陽秋正好
棹歌半是採蓮歌

憑欄

林亭未過西風動
杖屨

其固今人年文章
李杜主齊盟
酒杯停處花如屏
青山明月照林亭

螢窮愁亦足豁
瞽盲挽弓五石抵一丁
東西南北飄枯萍
古人長卧今人爭
文章李杜主齊盟
酒杯停處花如屏
青山明月照林亭

林卓間集

會稽潘水謔少白

古今體詩卷三

倦遊草

自庚辰至丙戌存詩六十首

遺懷

清明桃李花風吹筵前住少年今白髮天涯看春去
澁心浮春雲芳草催遠步樓臺立中天車馬盈廣路
人生亦已勞春風更不喻百情漫長日悠揚入飛絮
歲事春復秋人事朝還暮誰能一日中靜似無風樹

春夜

雲生春欲雨入夜月轉明娟然一尊酒海色浮天清
百年當花

卷三 倦遊草

時世界如壺瀛樂心一脉香萬物無與爭花晴夜更永風暖素影橫婆娑上春衣醉羨羣花生芳菲塞天地千載多令名誰挽北斗杓不復西南傾當春得美酒好夢兩腋輕胡蝶長悠揚何用狂青冥

野望

登高木葉下虛機來八垠遙空曠無際澹然起秋雲雲生天愈高下有川與原羅羅一水外靜翠環秋山前何人居
晚靄秀林樊乘風托遠致朗神遊其間牧笛自南來牛羊彌夕暄因知霧澤內人事亦孔繁百生各有為誰能出塵煩水際白石暮返照收微嵐幽蘭發榮葩寒蟬息夕暄我有一尊酒可以寂至紛

太古清且温造物俱無言

江行見山

春舟行澹蕩晴川泳長天鴈開玉壺淨坐覺蒼翠前碧流漾春
山桃花開欲然高層遠逾秀渺然異人間山迴出古寺慨眺不
可攀雲日青漸遠波光去不還邂逅心獨賞棲遲情復遷回望
一簣盡孤鶴飛江煙

對酒

懷澄百年遠日月轉芳蕙吟情昂六合澹與秋空對秋高物自
潔如人定中慧孤鴻極天飛輕霞燦其內彼物亦何爲神動得
其態一言徹清機可以致千載耳目有佳思靜中出警歎白日

卷三 卷遊草

照深林丹林靜風噫迢迢賢達人遐覽共天地

春望

長日如長線春思挂煙靄飄飄萬里風吹落青天端翔集無定
影世宇爲花寬妍華起人心漫漫遍溪山中得好春白髮無
由斑讀書觀衆理暇日多古歡太古遺名花至今香更繁請以
一壺觴與之留網緼

納涼

脩竹山陰道士家綠水蕩漾紅荷花瑤琴一彈上明月至今秋
夜憶天涯

見風箏

春郊晴步花漫漫引我遠思飛青空忽聞箏聲語碧落安得身上扶搖風

題旅壁

佳夢不曾閒天涯屐齒斑波濤魚復浦風雪雁門關笑指鴻濛始元如少壯間天風旋北斗無術駐人顏

園居

杯酒終日醉塵蘿垂門關春風滿園綠飛蛾出窗間門外春若何天地皆嫣然百生逢佳日曠宇無盡妍時芳萬物俱懷靜晷刻閒出門履晴暄桃李飛斑斑日午槐柳陰蒼然至前山山中無懷客可與共深樽

卷二 倦遊草

三

行堤上

幾日春風動柳條湖山佳處雪全消春波遠遠鳧鷗起煙外何人立畫橋

浪遊

我家廉讓問詩禮作世貺聯車載簡刻室無一夕釀先子悲白雲斑白志逾亮冰雪蓼莪詠里老今悽愴蒙生識之無性僻不好尚荷基有深憂趨庭戒用壯古人無歉事軒冕非虛望稟茲義方愛頗息躁競妄無師道中庸歧轍決堤防真心忘工拙塊志混得喪十二學嘲詠花月初有狀二十遊江淮杯深不可量逢春豔思萬對客豪情漲風生戰堵牆敵劾始挾纊盪胸敷春

華耀目詡好樣碧山萬里夢素壁千紙幃曉展峨眉雪秋葉洞
庭浪托跡魚鳥外寄興猿鶴上遠塗鬢欲改世味心覺妨浮生
悔蒼茫故態收跌宕觀瀾駭難卽羨山似可向行年三十餘初
見百氏誑老莊漸逡巡儒墨互責讓不虞或得譽默造亦致謗
七年藐姑射讀書聲忽颺羣賢詢劉巴行路識种放門嚴長者
轍酒辭白衣訪有骨傲荊州無書上宰相寸管初得窺斗筭喜
自抗玉京友大雅鶯谷聞直諒氣虛志易矯心隘蹇更亢總角
志鈔鏤白髮斯惆悵文章學愈拙至道窺難傍自惟涇涇質萬
慮或一當信天行步暇觀物今古曠居不謀一椽生復屐幾輛
時平春意潤書靜白日暢老失濟勝具貧無伊黍餉春波漾空

卷三 倦遊草

四

鑑明月浮釣舫輒軻本非病磊塊何由長憂來忽默慨得句不
能唱昔人誰與歸少日豈我償愧乏樵箸侶長違蠅蠹養悠悠
顧復餘僂影空俯仰

塗潦見兒童戲

城塗一雨潦可涉小兒濡足投長竿有魚無魚何足道且作桃
花流水看

初歲

少年屢夢上青天不道人今非少年人事拙如乾蓓蕾狂懷消
似雨鞦韆崢嶸白髮三千丈飄忽年華五十絃但得春風長健
在看花何必又神仙

秋園曉行

秋草及晨露，傍籬生碧花。畦翁撥荒蔓，閒數臥豚瓜。

早行

夢醒啟庭戶，月黑天正風。濕霧欲爲靄，高簷飛空濛。小市無鳴雞，睡聲環四墉。入門挑殘鐙，遠寺聞疏鐘。我僕驚亦起，倦色餘朦朧。寒吹如咀薑，呵手束兩驄。主人一笑別，過跡收泥鴻。此身歷山海，飽與冰霜逢。勞生爲誰役，太行三擊筇。據鞍袖短鞭，冰凌濡裘茸。老馬自識途，曠野無西東。前車屬叱咤，繚轍爭交衝。徘徊歧路下，旋却嚴凌中。小家有人語，短牖火微紅。哇哇兒童聲，子歸起夜春。扣門求沽酒，倒缶剛一筒。草牀聞欠伸，破衲睡

卷三 倦遊草

五

衰翁天地無風霜，睡鄉正洪濛。自言田廬間，醞釀不能工。未堪濡吟口，且復伸曲躬。歎息盡一觴，僕馬聊從容。天下無正味，勞苦易甘醲。十年遊已倦，將斂浮雲蹤。大衢多喧塵，作苦無權棕。好山滿天際，佳者如芙蓉。佩犢巖岫間，躡足春疇農。請與夫子俱，力勤致歲功。

老松

老松千尺經千齡，根下百尺生茯苓。茯苓生千載，固人壽金骨。玉質如人形，山人劚茯苓。牽松倒青霜，翠露橫一脰。株付匠尺枝，爲薪庭中鑪。氣常夜青，雖然均得益。人用風雨黯，慘辭蒼冥老樗。彭亨半生死，人道神叢拜不起。

細雨

細雨有簷滴夜寒人不聞山童晨縛帚落葉濕紛紛

哭姚鏡塘

曠目極天表踽踽我行獨智者杳然去斯道墮巖谷吾生從此
涯高天不我穀微言在今古衆化有耳目同心支太素珥視石
與玉吾行苦稜觚子道猶菽粟譬如左右步乖睽成子蓬蒿
桂太山哀哉何能淑

君行皎無累與我猥相羣蹈履豈必同契微所見親問之千載
上知者能爲言鳳凰自天來羽翮化爲塵我爲造物情愴然視
斯人

卷三 倦遊草

六

痛哭招子魂慘心不成篇篇成不可和孤情別有天疾風送汝
去大雅不復還苦心一縷絲重以千鈞懸颺颺隨衆化星辰爲
之旋千載誰與語知我者黃泉

鑑形必於鏡鏡去形日濁從今塵埃內失我眉與目用心在萬
里中道繫雙轂哀哉豈非天冥冥不可告長塗指霄漢環轍視
我覆先路者爲誰吁豈前人福

青山有日月千里待君歸君今隨遷化我行復何之杳然視聽
異耳目可無爲鴻毛寄旋風眩瞽心自知用情愧定學寸中爲
君糜共居笑言中默默喻者誰

北風撲窗紙君病衣猶紵裘綺陳一庭相視莫敢語解衣覆子

肩一笑心各許滿堂兮美人目成子與汝此心語天地真宰泣
如雨考槃餽伐檀彼歌此當舞爲君焚此衣哀哉兩心苦

獨坐見君書起立長歎悲獨行見君廬徘徊不能歸人生各有
願始與君何期直中之霄漢理心洋溢之古人與人同所異在
幾微茫茫聰明內鮮能辨端倪太空其謂何斯君以清徽

思君三見月見月心自傷與君持杯地綠草如君長百年復千
年脈脈一縷香俱無子與孫及身未能詳幽明各有淚白壁慄
無光埋之名山底千載空寒芒安得不死友爲爾繼豆觴

哭君盡寒暑神魄幾無存夜永人事短見子平生魂魂來就我
言相視衣裳單老病骨尙健努力爲其難田園今可去一笑送

卷三 倦遊草

七

子門握手復痛悲四鄰驚啟關拭淚不成哭嗚咽中心酸

悠悠法源路不信春草生花月歎浮世芳酒不復澄百年誠幾
觴如我與子傾持杯言在耳萬籟可無聲人不作聖賢何以冥
心情痛我終非子無以奉修名

白日忽已暝明月照我庭風悲清霜苦有酒不能傾積氣役形
質嗟嗟人之生金石不千年况此勞勞形選偶古今內而我射
無正夫子固已安琅然蜚光聲

峩峩澗上松磊磊澗中石明知天地內萬化無全跡藏君松柏

下終古長莫莫當時指青山期了古人責枯木行且灰未死有
餘憾九泉苦無底血盡繼以碧

白玉琢山岳清光映四域期心淨無累時盡可以息一生厭粗
糲曠視無終極知在天地內不以富貴力置身縈縶上衆目但
偈仄已矣泰山頽太虛無顏色

雪中訪野人家

昏籐欹樹舞旋風一徑漫漫烏鵲中屐齒到門童子喜主人醉
面已全紅

崇效寺看牡丹

朝來覽鏡霜滿鬢胡蝶醒怪周瞿瞿門前花事慨然盡落紅亂
委東西衢古塍草花發顏色乳蜂祝子蛾引鷓頗疑東君行未
遠誰家樓觀應少須道旁車聲紅粉語前騎簇隊指闔閭若聞

卷三 倦遊草

八

僧廬牡丹發玉樓春較楊妃腴無邊韶景從天降躡屐馬尾如
僕輿生隨玉人看花去此游豈與神仙殊寺前綺縠簇隊趨翠
翹搖憂青珊瑚酒闌歌倦語音靜容我野叟來興興繞欄映砌
無數株捫香指豔評西嬾粉薄揚州金芍藥韻遜若耶秋芙蓉
勻粧菸萼消滅後芳意單怯懷春初東皇下陳九十輩瞿夷正
得司香奴世間美質亦遭遇少見便覺傾城無未能暢發香海
豔且可小作吟壇醪塵眸盼此亦非偶拂石坐出襟中書高歌
漸朗音呶烏窗樨叢矚多清臚後生逡巡列兩隅肅然修敬問
里居僕居東南之鑑湖游踪天外繫轆轤瀛壺闔風花未覩世
豔經目當無逾匡廬捫星仙者歎華陔睨海賢豪吁琴詩屐笠

花酒月生世未有一日疏至今老拙形神癯蕭條短髮不滿梳
往事如傾良醞盡豪情欲蕪名香枯逢春反舌忽有語習氣未
淨猶有餘名花總藉詞酒力焉用寶幔紅流蘇老人送春思藉
手爲君題壁輸花租少年聞言聯翩至後者捧硯前提壺勸我
人間看花酒好春朗對凝脂膚晴香撲人日正午花影起立人
須扶玉人促借紅鞵踰頽然好夢周八虛夢中碌碌聞馬驅又
聞羣仙推我呼掉頭欲聲鼻自喚胡蝶中道猶脚躄星斗挂簷
鐘四動驚摩睡眼衣露濡羣僧皆散一僧跌笑我酒盡無人酤
寥寥初月照煙閣入門老樹風聲麤人間轉步異氣候醉醒雨
立千金姝紅妝照燭知誰在雨晴野叟來據梧

卷三 倦遊草

九

東坡生日姚駕部丁舍人招同小集各有詩

時謔作兩圖一爲水月吟觴一爲黃樓聽笛以姚先生稱坡詩序有李太白死世無此樂三百年之語感作也

序另有

君勿笑琴中有五名鞠通棲息朝陽之孫桐鳳凰一鳴日五色
此物聲亦應商宮日月輪轉萬千里百年與世偶然耳遠睇歌
嘯之古今欲酌芳樽向誰是人言千載兩謫仙皎如明月照碧
天我嘗餐霞訪太白鬚眉故在花酒前眉山非特詩酒人卽其
文章仍絕倫天機犀利前無比不必盡肖青蓮真太虛千載出
秀色花月溪山當不得作文亦不盡昌黎自是天然絕雕飾世
無此老七百年人心照映猶娟娟吾儕及身當風月胡爲黯澹

使華顛自許芬芳二三偶敬酌先生一杯酒造物不禁人慷慨
有生愧落古人後行年五十前無師竭蹶遠步冀不迷諸君請
讀范滂傳我且細和淵明詩丁叔雨姚夫子古今一隙蕩無底
白日苦爲吾輩駛古人天上落警歎世上好音空滿耳飛花一
片總春色牛鐸調與黃鐘似硯之洼海一指壺之中天一咫讀
書其間吾已矣

此日吳蘭雪湯茗孫集功甫舍人宅以詩索和

諸君讀書欲搜倉頡上眼色常向空中邀同心各復見奇氣秋
鵠玉影集蘭臯黃金買書酌以酒千載塊磊昂青霄才人偃蹇
總生色青蓮下乘無詩豪夢上大峨覽秋色頗愛赤壁賦後秋

卷三 倦遊草

十

江濤大峨三峯中獨秀髯仙孤立旁無曹古今文章爭齟齬但
用喜笑怒罵付春醪是在山東黃綺外能立一格並嵯嶢清光
上天作明月千年朗挂北斗杓後來巘岈諸擁鼻欲縮芳酒藉
白茅恨不與仙同丙子歲暮洗盞連寒宵紅燈作花燦六出此
髯憑几羣賢翹觴行千載一頷諾麴波翰藻馳驚鑣二萬餘旬
逢此樂誰與六合同風標却有空齋數病叟亦樹旗幟浚詩濠
古寺天寒鐘磬啞夜半高詠驚參寥座中落落二三偶俱耐霜
雪爭冬凋舉杯只酌戒和尙作詩俱擬無懷陶鄙人涇涇搔白
髮僵吟冥索傾枯楊惟有筮屐常萬里峨嵋山色濡征袍美人
贈我錦繡段猶能遠致英瓊瑤豈知咫尺百步洪坐聽明月照

清簫古仙化身千百億茫茫日月付樽瓢新羅一念致羣鑿晉
楚迭霸更嘵嘵我才不足當一校堅壁觀門捲旌旃不虞偏師
陟吾地強持一鏃直鳴鶻猶有鄰翁森武庫請移筆陣挑函嶠
正月五日大雪同丁卯橋登陶然亭吟咏竟日

詩狂習吟覽風月浸神魄卅年萬里路隨我兩木屐茫茫同心
人江臯夢情劇長安古僧舍聚書撐四壁出與新詩遊入與故
紙息城南陶然亭勝譽頗峇峇槐柳蔭夾塗菰蒲漫窪僻暑風
遠眺望爽見西山掖城中得高曠門巷沸而唳微霜木葉脫窗
掩塵寥閔如望蓬萊山弱水流瀼瀼好奇丁令威看花避馬跡
求趣冷澹內相約吟三白兩奇各近癡自謂珠並璧相對殊不

卷三 倦遊草

十一

厭晨起談至夕新年謝客刺攢眉視轂擊日攜脈望魂酬醉在
幽仄北風吹凍雲雨花旋如席僵吟各盡夜比閭天海隔開門
視深淺戶外積一尺鐘鳴燈影澹簷日明玳璫喜書紅蠟箋邀
與之南陌彼書亦已至兩意各加額泥深輪爲方冰利靴如劃
顛步足屢躓吟和手迭拍路旁擁袖人遙望笑俱啞拂埃啟四
牖風面皴欲塈皎然兩玉樹俯仰遠揚抑萬戶煥春閭比瓦界
瓊巖遐覽爲人間高標泥風翻曠哉佳天地朗蕩神明蹟玉壺
九萬里皎見秋豪析大千靜無言人事自華實花柳氣之葩冰
雪氣之核造化縮兩手冷看陰陽釋有時展風期與人作娛懽
生長熙衰下閒年一當百有酒濡我唇有詩快君臆此樂邁千

古萬戶未擬易亦不控飛翰更作馭風客蓬蓬垂空雲晴霄曳
幅帛來爲天下穰功成不言勩靄靄遠人廬區疇釐井畫豐歌
和擊壤百蜡一日澤豚酒相往還雞犬自鳴趨太古潑潑活人
事惟農穡西山潔水面鏡裏娥眉舊五城十二樓瑤崑倚晴碧
方知宇宙大自快耳目闢頗憶九月初衰蒲候重噴晴步偶至
門小閣聞對奕抵掌談天衍支頤雕龍爽後生八九輩憑窗剝
蓮葍或提青素管雄睨岸巾幘彼亦頗一時寒冱酒椀窄叢叢
古壁間埃縫經坊填春香與夏綠斑剝碎標格舉酒屬諸公來
共杯中滴東西風馬牛快意各憑軾夏虫與寒冰自古不相覲
不知興會異抑或吾輩癖我昔窮山海撻眉望八極嚴冬登大

卷三 倦遊草

七

峨吟詩剗白石置身聊浪中要亦不無得衰年喜便靜枯毫收
羽翼十步蓬底廬讀書可以默但得二三友朝夕慰岑寂來牟
歲云豐酒賤不須惜是中陶然意不以一塵厄清機鼓犀利選
偶亦樹蔽杯翻灌瓊驟思出縱車急得句輒易觀卓管舌屢咋
僧僚竊目哂僕語亦影射蒼煙自遠至疏星挂簷隙凍烏覓梁
栖戢翼聲格磔醉飽各頽唐歸笠風刺刺六街滿煙火車與忙
似織入門泥漬袖冰硯索火炙家人苦相問大噓至曲脊明日
聽笑談人間兩癡伯

獨行

是地逢清賞無人多此君溪橋出秋樹山寺坐晴雲孤聲因風

至幽泉相與聞青山與籐笠各自攄清芬

道中

輪蹄千里蹈秋光到處樓臺墨瀋香馬氏遠游猶講業陶公談
理只傾觴長河曉渡林藏月太華中峯葉有霜常愛山雞學鸞
鳳不能鳴瑞自文章

抱瓶

抱瓶汲澗水養開桃李枝桃李實可食瓶水復何爲
浙米深澗凍故甌爲君炊玉壺漾春風故甌費人持
春風吹百物榮瘁各自爲花藥同一根豈能齊芳蕤

河東道中

卷三 倦遊草

三

登臨容易感人懷迺酌千年水一杯四皓未消談士氣二疏聊
當客星回潼關曉月悲笳勁汾水秋風旅雁來自古名山鮮至
識每從奇處說人才

碾房驢

終身隨蟻旋磨外終日掩目聞鳴鞭若教聯軌識前路半生行
已近青天
天涯空澗有時盡尋尺周旋無已時若許閒翁吟背上不知載
得幾多詩
旣無騰驥千里足不肯忍饑沙上眠世間枯萁亦錢買安心閉
目待蹄穿

觀穫

暮林村墟合稻穫寒色遠竭作日易入分儔各在阪微月霜跡
聚蒼烟人聲漉巷頭燈火出知是勞人返勞人日有役歲暮笑
語緩里門來秋風寒草香意晚獨吟蒼茫句悠悠加餐飯

斷澗

夜寂秋聲遠幽巖側太虛篠鳴猿落石月動獺窺魚萬古雨露
積一痕江海餘因山成久住不是戀沮洳

月夜偶出用東坡定惠院原韻

客居小舍雨作祟昏目讀書憂近夜窗前疏竹光忽上門外閉
堦步堪下老蟾久蟄出更快銀漢照秋晶欲瀉樹梢界空葉可

卷三 倦遊草

十四

數鵲影在地枝屢亞半生面壁賴無弦萬里收踪餘不借一邱
一壑傲松喬獨詠獨游挈鮑謝閭門靜眺曠寒原水碓無人橫
虛舍小村疏柝類啄木江岸漁檣如束蔗回塗數犬吠不置深
樹一燈幽可怕叩門久立面寒籐霜重鐘鳴鄰僕罵

大峨仙人秋月魄海外騰光照清夜餘生纔寄破竹外好夢已
到殘梅下踉蹌屐齒自南來滄渤詩情向東瀉清言時出莊列
表氣韻固是神仙亞墮地自存千里志信天不辦一棧借浮海
看山亦命定僦居有樓宜表謝歸途白髮已過丈經眼紅塵猶
避舍我亦習苦如蠹蓼老未逢甘笑枯蘇却無仙謫礙雲間每
讀君文常夢怕安得燈前一杯酒坐聽此君喜笑罵

題山寺

曉谷霞生澗春疇路繞花過橋松翠斷臨水寺檐斜古壁有題
句空山無酒家岩阿自太古僧事在桑麻

山村

古樹岩前屋春山雨後泉花香入窗牖雲影過晴天無事卽淳
古多文留妙年靜中芳意遠長日足吟篇

讀書

讀書多在鋤犁畔携屐不將絲竹隨三戶釀家供少醉一樓山
色值多詩遠天掛雨斜陽外高樹墮蟬獨詠時閒日騰騰人自
有更須閒處覓清思

讀書雜詠

卷三 倦遊草

十五

四老在戰國天地方雲雷事外悶耳目同心聊徘徊耕圃俟太
平用心亦恢哉時定視四極身老材不材兩止泰山雲可以長
卷懷晚出定漢惠功名播九垓稿靜終有用戰國士無儕聖道
本方軌奇謀喜歲曩日光注少微雍容可風規昔聞周太伯羽
翼鮮奇才

陶侃戒荒醉酒器投之川彭澤乃飲人處世以酒賢酒豈賢者
資得失有所先舉杯瀉清光天地皆熙然其中千載論吾能爲
之詮世惟劉阮輩酒器誠可捐若遇柴桑翁吾爲釀春泉

初春雪

樓曙鴉聲靜開窗密樹斜風寒猶到地春淺不妨花盡日掩空
巷夜窗明月華城南燈事好冰屐泥行車

夜雪

竹下廬如艇夜來雪壓蓬注醪吹暖火隔樹聽旋風古調冰心
疊霰霄玉影穹身疑圖畫裏烟渚著漁翁

山中

野興無要約山花發暮春水雲閒到處魚鳥自親人脩竹溪聲
轉芳疇細雨勻寰中人事好須看太平民

夜渡焦山

夜暝濤聲壯烟空島與織月生揚子渡天近海門帆江漢浮初

葉星河朗玉笛風波緣底事佛火挂松杉

訪客不遇歸見客詩几上蓋久待卧醒詠成方歸也因書

紙尾

天風吹花落四面榻中二叟不相見君共莊生栩栩時我坐習
池靜揮扇蟬聲暮起月照門歸見雪泥鴻爪痕世間蕉鹿豈幻
境知君此夜夢清樽

好月

山館初涼夜幽窗橫暗籐葉聲疑小雨霜意入秋燈萬能皆能
寂孤懷獨自疑靜中猶有芳漫興韻頻增

林阜間集

會稽潘 諮少白

古今體詩卷四

卧游草

自丁亥至癸巳
存詩一百首

秋懷

以下多病中稿

獨吟秋懷遠悠然忘晨餐人生樂如此貧賤安足論百物各有
天衆化同一原淨宇曠無際靜懷如其寬出門逢秋山時亦持
清樽所樂既不爭人亦無間然百年自有適何者為華巔
荒園草樹色倦息即吾廬雖無盈樽酒左右有琴書柴門臨東
阜農稼亦足娛天青一雁遠秋原可踟躕息心順四體晨興時
荷鋤逍遙人事中游與萬化俱

卷四 卧游草

采菊霜草中秋晨百草馥芬菲自令節何用擇巖谷閒居多佳
懷讀書飢亦足空庭日陰午午餐摘葵藉蕭然天無雲高風動
林木日靜山氣清聊以騁遐矚

寓園請主人剝棗

北窗誰樹棗秋老霜實丹西風揉繁柯星隕撲簷端鄰童屋上
舞仰援墮長竿危瓦枯蘚滑遙立惕人看是輩獲所求豈知危
與安淵潭不生珠人免魚龍患請君及秋時一窺場圃門摧條
振疾風繁聲落飛丸既盡草木用且靜猿狖喧不妨呼鄰童來
拾青黃爛筐篋紛握攜笑言樂趨奔一樹幽風歌可得十室歡
惠施誠易匝貧欲飽不難曉風打窗紙孤客夢始寬垂垂屋角

枝曉霜葉翻翻餘實雀啄墮聊用嘗甘酸此味近稼穡澹樸類
饗殮其熟亦以時令我思田園安得共里老樹陰話夕曛

白日

白日澹已夕悠悠歲將晏百年復幾何秋鬢霜雪繁少壯心跡
去乾坤夕復旦幸無車馬勞惟覺歲月漉身閒得修暇聊用狎
琴卷此心靜可用讀書百情遠豈知風詠樂庶無忝求緣寒林
明秋山曉光寂遐旬閒園清可詠遙天有鳧雁

持螯

病食常恃粥一歲屏芬燔口耳寂無營澹然得吾天靜中時節
異秋氣展人寰朗朗神欲蘇漸復初情歡仰天時一詠揮琴坐

卷四 別游草

南園正值持螯時籬菊倚霜搽試與斲雪嘗命僕酤一樽病齒
逢故味舊興悠然存遙遙曠潔天舒懷軼秋雲青山固自遠酒
爐聊可溫更憶素心人遠跡共林樊十年對菊花妙思注春泉
人事有佳致清機與爲緣於今雖能閒孤吟秋風酸優游藥石
暇自曷徒加餐一日有耳目曩懷安能捐他年勝枯筇誰與娛

溪山

未寢

星河澹寥落萬戶靜掩關獨吟行中庭殘月出樹間陽牖竹露
瑩陰垣松氣寒殘月不如新靜好無人看惟有古寺燈熒熒懸
前山久視定欲動蔽虧疑往還或是早行客已陟崔巍巔早行

月味苦霜露漫高天古人詠殘月多識關山難我於少壯時一
一諳其端少時春滿囊看月紅燭邊呼爲歡喜輪千古疑長圓
一別窗前梅出門霜雪繁馬上看明月清愁來澠澠跨鞍三十
秋鬢髮皤然斑頗羨宿鳥樂稍厭雞鳴餐思得一邱壑濯月以
清樽遙遙鑑湖水忘魚亦無竿病足不勝屐悠悠卧通屜惟留
一卷書與月娛殘年殘年如殘月靜好且勿誼扶杖旋室中人
事無牽援吟倦日午睡夜起步前軒濁酒不時得亦有瓢與簞
二仲不時隨且與古人言惟識天地永豈計時序遷古井已作
冰安能激爲湍何人月下思如我少時歡茫茫掩關內靜意照
門鎖更何山中人高吟坐欄干

未起

卷四 回游章

三

蓬窗日高卧客至不敲門但聞枕上吟佇聽霜跡乾遲迴却車
去日午復來旋主無慊慊客客有怡怡言世宇燦光華物情如
壺寬日晴羣彙樂吾亦居其間藹然對客笑無他居能閉古人
愛山居謂無車馬喧而我少壯日驅馳緣溪山頗以二豎力龍
鍾謝登攀屐折久生苔鶴飛亦不還息心藥一爐憩迹茅一椽
春秋多暇日仍得高吟歡永日無他求瑤琴時一彈掩關逢佳
月清夜星漢懸不知影與形是何神與仙好夢避無痕好詩來
無端見日聊曲肱逢君叩前軒聽歌潛詠歸重來有和篇我吟
如古琴適意本無弦君詩如異夢發蕉鹿宛然妙趣出音聲其

理非得詮炊梁亦已熟與君共朝餐昔藉芼爲羹是爲先生盤
與君遊至澹此中無紛紜人生能求安懶倚天不嗔暖日照晴
實誰非義皇人歌嘯有至樂此懷得共論願言永今日爲子設
清樽兼百得銀粟常飲更晴景中無來世

秋晨二首

朝日照簾下清露湛芳離怡然吸其英幽香如我思香是造物
心受氣各自爲含質燦光耀所著非前期霜露皆有滋榮枯乃
其時勁萼或冬榮柔蕪亦夏萎吾生諒弱植衰病憔悴之幸有
本性存滋息來微微良堪自怡悅豈必紛葳蕤靜視草木情同
此生息機有生各自好優游娛清輝晨光照閒階隨意近芳菲

卷四 四游草

四

秋園多佳矚幽馥生人衣置身遷化中白髮何足悲
簾外朝日上輕雲媚晴天雲消碧天淨山影落我前遙情寄素
心拂軫弄修絃清音激空起天色逾娟娟泛聲泊長風曲自心
手傳不知遠耳音誰與枯桐綠清濁自有真聽者識其全百年
一彈指陳迹如陳編一室醞芳香千載評蚩妍宮商出素絲曲
調遂不遷後人評此生將謂愚與賢且盡今日懷斟酌聞聽先
資生兼百物脫粟常腹便謂是中無求造物當粲然日月轉雙
轂往者猶逝川惟持曠蕩心消我懶散年停絃慨然歎漫吟遂
成篇

望月

閉門百喧屏坐卧日已夕昏鐘動秋山冷月上素壁清光靜覺
動漸滿琴硯席秋簷樹木疏虛室竟夜白澹心若河漢天淨微
有色寥寥涼風下千影萬影寂見君終夕暉惟有獨吟客

九日

與我悠然影與神箇中索解有先民黃花原是幽人節白日閒
於栗里身此調趣從絃外得是翁天向酒中真有生故在無懷
世較似前人醉日頻

自題門壁

柴扉掩蕪蘅靜若無人行幽室更垂簾空院天晶晶惟當秋月
明時聞讀書聲

題窗壁

於中十年坐虛室如空巖外有無塵天內有無縈情各涵千古
意朗然相照清聽之不可聞攬之無形聲門外窺門中竟夜寒
燈明

憶昔

杏花開日橋頭店霜葉紅時水上村日午槐陰楸局靜雪晴樓
幕酒爐溫

秦岱五更霞作幃大峨八月霰成珠洞庭秋浪船如蝶姑射春
雲屋似爐

竹

窗前種竹四五箇每夜佳月貽清陰明年更種小桃樹開窗便有黃鸝音

看鏡

數十年前無是公初由牛角漸成翁可憐食粟如君等無萬今來古往中

晚飯

扣箸閒歌謝夕陰勞機一日又西沉未甘却謝柴扉月應補浮生半夜吟

看月

虛窗碧天方竟丈秋魄正上疎樹端塵外閒眸雲外月兩邊朗

朗各相看

閒居

一窗今古長容膝萬里溪山寄曲肱觀物何嘗分楚越讀書差得辨淄澠樹間人有林臯趣秋靜詩傳月露稜算有白鷗閒似我鬢邊猶見二毛增

卽景

狂客居然作病翁閒情時動溼灰中鑿池添箇人間月畫鶴忽憑天外風往事偶談能醒睡好詩自唱可醫聾貧廬頗得閒眠趣肯遣双星輒送窮

病身

病身只算蠹殘書，食籍惟存藥。巽餘風月最關無事客，乾坤豈有後彫樗。好春乍轉，物華靜太古，將形人事。初少小本期農稼，老倘應倚杖看新畝。

架豆棚

清和庭院掩蕪蘅，剛取疏篁結豆棚。爲憶涼宵清簟月，近西窗外種秋聲。

送朱幹臣

野餞停觴各有懷，病夫頭白客心摧。相逢未必能多飲，且盡花前酒一杯。

買菊花

卷四 卅游草

七

日日城南竚看山，秋光晴好一身閒。從今不厭重陽雨，庭有黃花耐掩關。

憶昨遊

酒氣春浮漢上洲，爐煙晴汨華山樓。秋豪灑落雨珠玉，春思駭馳風馬牛。長物只須桃竹杖，卜居無過木蘭舟。少年事去豪華盡，古硯寒泉不復漚。

畫梅四首

高枝綻一萼，包結無邊春。遙遙太古天，朗然生玉人。

初梅

春風自嫌絢冰雪，爲肌革皎皎非太素。了空洗香色。

殘梅

美人清夜起，深雪梅花寒。相看兩相惜，皎立玉欄干。

雪梅

寥天寫素空纖月照東嶺惟我與梅花平分月中影

月梅

明月梅花我

我吟西階畔明月上東山撲面梅花影掩我霜雪斑
含杯芳林下明月直中天我在香影底月在香影巔
醉眠梅東軒窗月寫全樹香魂窺人夢問否羅浮去
碧天襯梅花淨碧光璘寯贈花一輪月中見花神
春夜勝春日百花並爭月澹澹梅花邊春風露秀骨
明月照梅花玉顏鏡中靚梅花照明月疑是素娥影
梅花語明月翁詩冰絃音明月語梅花翁詩無絃琴
花不虛作香月不虛作圓我看月與花豈虛生林泉

煦齋先生自龍沙寄惠書畫幅

卷四附游草

八

龍沙積雪望嵯峨海角羈臣近若何左相丹青猶倚馬右軍書
字慣籠鵝窮荒尙荷重茵遇時有病蒙賜玉庭芝圃隨侍白日終憐雙鬢
皤若問山陰孤詠客五年病頰不曾醜

同人消寒會飲作消寒辭

另有序

天地猶大水四時猶大舟載物迴廣莫隨波任泳游後水日益
來逝者無去留遙遙大化內聊用舉觴籌白日催旋杓巖冰漫
山邱對此不盡飲春來人白頭良朋得古懽詩情出九幽但覺
天地好顧盼有吾儔舉杯勸飛光萬古無停輟不如駐光景照
人酣高樓風花怨陽春霜葉悲素秋樂生不自曠騷人例多愁

請君鳴玉琴左右發清謳雪花飛如席不敢近酒甌及此聊自
豪醉鄉多公侯寒光如玉人皎質明且柔深樽有淳古其餘皆
悠悠願得傾海釀泛濫同白鷗無爲關門睡屈縮如蝸牛

消寒九事詠

幃

寒光栖檐長一線寒風穿簾欲冰視主人裁錦作重幃靜掩高
櫳邃深院藥爐茶竈就窗日日午竹陰來四面紙帳融融涵太
素今古無邊書一卷夜寒擊柝正三更庭外嚴霜集如霰曠野
飄飄誰氏子故絮鶉懸纜至胛咫尺陰陽異天地束手猶嫌京
入腕誰能割毡席廣路念此抱膝坐申旦鄰牆高索响金鈴留

待花開作春幔

卷四 游草

九

鑪

博山細篆凜不紅蘭膏凍賦僵玉蟲洪鑪鼓炭出槐火爆聲裂
竹星迸空須臾元氣轉九地烘托人意如醇醲瓶梅小蕊燦欲
發筆濡墨潤書字工枯株將灰猶有用宣洩造化成全功深山
飛瀑懸作壑樵夫伐木叢冰中高閣暖室暢笑語老樵晨爨薪
霜蓬昔來燕北塗遇雪凍泥沾展行錚鏘燎衣索炭豈論價溼
煙冒戶眯雙瞳窮檐曝背亦不易况復獸鼎飄蘭芎留香小室
覺冬煖垂幃不動門無風鳳團活水作解眼享此豈復異千鍾

酒

鑪旁捉管猶龜手硯墨生稜磨以酒試傾大勺灌吟唇挹注天
和令人壽壺中自是有天地得春最先風氣厚剖除機械還自
然是鄉耕穫可長久人生如行不盡路千載無時釋肩負古有
聞人日無事但飲醇醪已不朽此中豈必皆酒力真味湛湛不
可叩後人豪飲如飽殮終日加餐亦何取靜與古今遙唯諾閉
門獨酌閒扣缶閒來得趣正自永莫待春風到花柳左圖右史
託一椽髡心最歡能一斗

書

隆冬寡客門可鍵心似眠蠶室似繭擁爐獨酌日轉永賴有書
巢容偃蹇詞章論說千百輩招之畢來於子館古今遙遙一大

卷四 卅游草

十

局袖手自旁窺以管靜中車轍轉滄海修塗到天未爲遠生與
昔人共天地百年常苦白日短欲持獨繭絆千鈞草木飄風何
足算自盡生前應讀書非與先民絜長短寒光東壁復西壁數
漏挑燈更已斷是中堅苦有至樂坐此襟懷苦巉巖寥寥空宇
擁寒氊來者於余孰深淺

睡

晝寒蜩縮不出門夜寒鰥目思無端是中轉輾得佳趣不時睡
起乃悠然讀書能閒日月靜夢醒豈與更籌緣倦來攤飯作仙
去高簷凍雀寂不喧更闌月落燈影澹坐看海日栖東椽混沌
開闢本一氣晝夜寒暑乘氣旋百年勞勞幾朝暮孰肯好睡遺

悲歡一生旋汨逐光景忽醒忽夢如瀾湍少時飛翻多異夢欲
挈花酒隨風鳶年來夢境漸平易睡鄉只似人間寬左顧大甕
右高架中坐一老藹聲喧造物下視摩兩眼付以澹蕩忘情年
推書睡起問何日已見花月臨前軒

客

掃徑無雪宜杖策剝啄聲來必佳客故人讀書思覓儔手握一
編僮抱冊寄懷空中各何用兩月冰霜髮增白吾儕未易生並
世語向旁人皆格格索居幸不隔山海何用孤吟盡駒隙同心
相對可千古胸如太空忘計畫捲簾入室壺有酒萬化千機此
中釋海內知交今可數春來酒量幾人窄相逢已值梅花發朗
朗晴輝照天碧今宵爛醉別餘寒明日同君觴月夕

卷四 游草

十一

燈

壺中春意酥殘冰賣花小市先賣燈高吟夜歸月漸好星橋火
樹連芳塍樓頭玉笙宛轉出紅袖手約鞦韆繩春城十里散蠟
燭繡戶照灼青油軒歲華瞥眼入羅綺餘寒席卷如解醒窮廬
剔釭意所愜偶逐綺隊沾芳醺名香深處蟾更朗始知人世多
娉婷韶陽如酒醞漸熟老懷一醉不願醒入門清輝在竹樹依
舊兩眼逢書青據几落筆聲振戶鄰窗刀尺碎皎繪燈前用意
各有適聊吟梗概記吾曾

展

拂拭經年蠟屐泥落燈風起日漸遲太平康衢容緩步况復淺
綠遍芳畿少狂汗漫衰欲倦門前十步行靡靡昨冬尋梅踏深
雪頗怯齒滑石路欹流年暗換人更老知復幾緬履山溪好風
及時動小萼春意藹藹催扶藜生與造物乞遊福貧散遠歷無
鞿羈百年只此苔上跡留付知者評生涯見花偃蹇便孤往過
客笑視驟雙駢入花拂鞭墮初葢小徑旋馬愁新萸方知遊山
只須屐好詩不逐追風蹄水村山郭春又至蠟此須及紅芳期

花

寒冰束木如潛虬秀氣忽轉蒼龍陬經冬見花倍娟好猶人驟
富侔公侯老翁衰鬢不更綠却換冰雪之詩愁時逢九九見精

卷四 卅游草

七

彩名香奇豔繡人眸芳園臺榭聒簫管輕車細馬如水流明珠
論斛買殊麗桃李只與臧獲儔萬人看花作歌舞得趣默默風
馬牛我自少狂陟山海身如花片乘風浮往往蟄居無花處經
年不識春風柔馬前屐傍時一遇對之吟句情幽幽芳懷約略
如芳醞以花爲麴詩爲藕鶯嘲燕罵殊不惜只許胡蝶侶莊周
小庭無花但種草閒意亦足散沉憂年來春思轉磅礴步隨花
遠不自由好風歲至人日老佳日不可無觥籌巖寒轉瞬已避
舍東君爲我羈芳鞞古今同調索不易總有好句無人酬清明
上已語知者老夫當與酣山樓

坐憶

坐憶韶華惜少年閒窗寂歷杏花天兒童喚起鄉關夢高柳春風落紙鶯

野塗晚望

四韻

漁蓑樵褐繡鞍纓俱在夕陽紅處行今古元無閒歲月東西各有遠塗程村煙欲暝塵初靜林雀無喧月漸明何物不隨羣動息讀書燈畔讀書聲

題人桃花源圖

桃源居人如穴蟻中有數里之天地子孫漸多耕植繁生人百事焉取備我聞羲皇無懷人亦有父子知君臣豈有日月不照處花開酒熟嬉千春

曉起

卷四 卧游草

七

曉起坐欄角夢醒神未醒風高白雲遠修樹涼蟬鳴澹然視聽存兀若忘我形形忘心更瑩中有寒淵停何以答太空至老無紛情惟此澹蕩意坦對天真冥吾視容膝居寬閒際滄溟風雨收餘暄晴色起壺瀛兒童啟前軒開窗拂四樞硯池漾晨旭短几羅羣經門前一樹桐歲來作秋聲不用持酒對但與吟詩聽百年聊如此老矣吾何營

偶作九言四韻

半生笠屐琴尊遊釣具涉歷山水花月雨雪風浮雲勝事與年逐隊去老懷靜潔自視如秋空中冥冥百物形質具一絲一

髮起伏懸鴻濛尺椽上漏下溼不足陋吾與今來古往居其中

送客

送客殘荷外夜深獨掩扉夢如霜後雁日日近南飛

病甚朱幹臣戚蓉臺等皆大戚口占二絕

死生聚散循環事人與人歌一理旋若問此生何處着原如五

十五年前

顏淵三十壽無量一日抵人千百年我亦有生過五十還如五

十五年前

初步庭外答人問病效白

久病心情似葉乾琴書花月興全闌晨軒稍稍侵階坐午飯菸

卷四 游草

齒

菸萼苻餐遠樹風聲秋又至小池荷氣露將團重陽無雨人強
健擬爲黃花一倚欄

新春答人問禧

東風漸近看花天病坐孤吟又一年却喜新春吟坐處藥爐前
換酒爐前

夢中與水月翁同舟歸有咏醒續成之

有序

夢與水月翁同舟歸舟中對酒誦太白詩遂有咏曰魚網
欲收山影起子劇賞之戲曰却近潘道遙不是太白醒則
其舊句也今集中無之矣子咏詩雜選醒憶輕帆下春流

四語感續成首時辛卯十月一日

登臨碧天遠古今獨徘徊故人爲松柏玉杯生塵灰六年憶君
詩秋燈中夜哀山田落黃葉遊子何時回生世不並耕悲夢入
枯槐夢中忽相笑今得荷鋤歸輕帆下春流二月桃花開談話
碧雲近江南山色來此境豈人間可以泛春醅吟魂傍明月與
君游八垓寂寂苔溪流墓骨鄰寒梅同音不同願存沒兩相悲
千載江海月此夢可共誰遺文不能言搖落贈章稀欲挽長夜
魂馨吐萬古懷嚶嚶遠雞聲顏色長相睽

不寐

寒夜靜勝日不寐聊亦眠悠然得此生衰病亦吾年不耕復不
稼濁酒對湖山不覺老已至身世俱倏然生愛田廬遊謂得耕

卷四 田游草

五

鑿天却無一畝萊爲曠桑柘邊常羨榮啟期而恐愧伐檀所幸
一簞食無取三百廛後人評此翁諒亦謂不煩無補百物用於
已寡尤愆傲廬風露入落葉墮窗前窗明殘月上東壁見琴絃
擁褐吟漫漫鴉聲起南軒

困極欲卧見月又詠

於世愛佳月其餘惟青山謂此非嗜好毋亦情之偏山月照幽
懷息塵六合間舟車老無事常欲自鋤園非爲豐歲計負耒有
餘歡春耕復秋稼古風悠然存生無植耒地荒穉時佇觀亦如
無絃琴靜撫不能言無人知此意朗吟月在天

待夢不至又得一首

處世云若夢夢亦來自自然恬神忽已合求之失其天人生顛倒
中設想皆妄緣我夢待時至修短奚計焉耳目有常理物來初
無端嬉遊一刻內及時皆得歡朗朗月光無人時已圓不知
今夜夢更復游何山鵲動見樹影風霜知天寒百物有遊息歲
功登鄰屋萬戶入幽咏貧賤居亦安生我無懷時得我優游年

陶槎翁邀飲爲星江舍人及座中諸君畫梅

我今不飲幾日哉酒爐煮藥囊生苔毫端墨瀋蠟亦盡六年卧
若冰底灰夜吟頗覺味曾好宿疴欲去結習回翁來見我和陶
詠欣然命侶滌酒杯聯瓶沽春竭東海醇風千斛洗虺隤東鄰
舍人翩然至素心照映如寒梅更有清談二三偶拂硯索紙吟

卷四 游草

六

作詠圍爐茗聲轉秋浪起觀壁畫惜埃煤寒空日午凍雀下高
簷樹影橫冰枝宛憶孤山領鶴步寒厓嗽激清泉迴興來索絹
磨斗墨畫作雪澗明晴暉玉人遺世皎獨立碧天淨月照修眉
飲盡三觴作三幅顛吟欵字左右俱主人笑我老更放筆如掣
電鞭迅雷大蠶湛湛望無底韻事不厭光陰催是鄉自古無水
雪四時春意如重醅重簾日落月已上玉山未肯亞崔巍六年
身世今日樂餘疴盡去爲裳輻未知飲此復幾斛糟邱殊勝黃
金臺酣情漸漉夢欲至冰街夜靜霜滿鞵殷勤相送二靖節出
門望月明星來我思乙亥重九夜孤山詠集同音偕菊花縮酒
祀和靖時無雪萼對金疊今日梅花贈彭澤天寒籬下雪作堆

百物要以氣韻合二老相遇必無猜諸君持此語造物芬芳生
世須有儕古今若無彭澤輩梅花菊花俱妄開

招端木井伯閒談
老去風光指一彈讀書終日綠蘿端不知身後名何用聞却眼
前花不看來日有涯迎馬首逝川隨分放魚竿此生須盡遊吟
趣費盡年華吾即安

抄春望

坐覺新陰好織蛾繞扇飛十旬九卧疾花事過薔薇
作家書後自詠
衰疾歲末已終日卧南楹芳草淒以萎白髮隨時生長風動秋

卷四 四游草

七

色萬里吹寒聲農疇卒南畝遠塗稅長征有身各為營歲事俱
已贏孤客但高卧時序怕然更豈無生所藉遠志守真真飢寒
誠切膚何似愧作并

暮春野望

薄霧靄南城微寒怯曉行人家楊柳色晴嶺鷓鴣聲燕北風花
落江南衫笠輕枯萍隨水漾亦自得浮生

聽人述山居

幽客涉鳴瀨蝸居有小村渚煙沉釣艇溪雨掩柴門見說雲山
外曾聞車馬喧古今耕鑿好世世長兒孫
讀元真子漁父詞憶前過西塞山有詞和之竟稿不得復

成五絕句

江上青山有釣磯
江天空濶鷺鸞飛
漁翁正似春江水
萬里閒心印碧暉

生長江中好是閒
眼前處處有青山
東西南北高天底
恰在桃花流水間

波上浮家一笠寬
洞庭秋色倚舷看
人間但有煙波處
便好狂歌植釣竿

屈子無心繫釣船
嚴陵不肯放魚筌
古今惟有柴桑老
妙解琴心不用絃

靜理綸竿當讀書
遊心亦近葛天初
吾今頗學孤山鶴
只種梅花不釣魚

花不釣魚

城南春暮

法源寺裡杏花稀
崇效菴前榆莢肥
新竹新槐閒院落
輕衫輕笠好晴輝
行隨野水閒雲遠
倦共鳴鳩乳燕歸
羞比古人安逸處
稱身不必製荷衣

八月十六夜約吳湛煠林笑峰邱蓮厓龔澤山鄒覲庭看月以詩代書

一度秋光月一圓
老懷遇節依然纒
成小夢便明日計及中秋
又隔年爲惜星霜宜嘯咏
喜無風雨損嬋娟
今宵共約冰心侶
須待壺傾月落眠

獨飲

疏風澹月掩衡門
楓檜楸梧葉滿園
時過重陽渾不憶
花前惟有一清樽

鹿門舍人飲子酒集客必子善者歸與周侍御語因誌以

歌

十年知交殆欲盡
存者星分逐鞅鞞
眼前突兀見諸公
海內芬芳此其雋
楚南舍人惜暇日
恐我枯懷苦隱鱗
芝蘭玉樹以氣合
集之一堂酬以醞
同心得朋矧對酒
芳懷各藉深杯引
左右玉映愜顧盼
合衆所長形吾短
武林納言神最繁
冰骨不受纖塵洩
閩南學士修且謹
中有樸誠存悃款
漢陽司平風力遠
茂

卷四 游草

九

古不爲温飽
繆是皆歲寒
冰雪姿謀身
則拙謀道敏
舍人醜酒風我春氣韻
殊與醇醪近
是時晴陽照窗樹
細象爐香曲如蚓
壺傾日落人旣醉
歸話西山並聯軫
桂林侍御執綏前
華岳峰巔見秋隼
是嘗與我言讀書
每慕古人思蹇蹇
人生讀書苟有慕
濫觴孰測江河遠
有美一人隔南海
獨立滄波峙巉巖
素懷未盡身已病
時聞朱幹臣病
愛莫致之心轉輾
是與往者水月翁
實修照古聲非窾
冰蠶腹中自有絲
不盡經綸不能卷
我自交朋漸分散
心無樂事身亦瘡
四時長卧憶江湖
惟見諸公顏一莞
永懷好修各努力
古道雖遙慎勿返
衰年所見期更進
此身猶待加餐飯
鳳凰卿雲爛霄漢
飽遊太平弄漁扁

暮寒寄鴻生

暮寒思傍枕兀坐又聞更惜此良夜永欲遲殘月生扣瓶村酌
遠繞樹小篇成後有無懷者應知此夜情

夜坐憶故交凋謝盡矣感而有歎

瘦影燈前雪滿頭病懷書畔久無儔自言頑放幾忘老畢竟歡
娛不敵愁視聽欲爲諸子廢古今都覺此生浮是中未測蒼茫
意孰令吾儕曾唱酬

目病廢畫偶寫蜀江映日視之竟不成皴

昔年遊山千里足扶杖旋行不出屋昔年看山千里目咫尺對
書疑無墨山中同遊諸勝倫荒阡野草成孤墳空齋病叟卧闕

卷四 游草

三

世自今非復山水人久無遊山詩惟有遊山夢捫星涉漢故是
夢中事老來自覺心無用世事到心都不耐但苦悲歡似山重
旣爲無用身未息無用情濕灰當風疑欲起妄情頗類冰致蠅
白日輪轉已萬里誰能繫之以長繩人生歲月如行路嘯傲閒
散亦有程清風朗月尙不能多取何況富樂壽考千載之令名
曩書懸枯琴造物知我心我亦知道物留此欲盡未盡高山流
水音此生復幾何暇日且自好息心到圖史何物縈懷抱忘懷
寒勝燠樂意飢亦飽生年亦非暫少壯直至老悠悠復悠悠人
間多白頭愚者百歲只一日達人瞬刻藏千秋及身樂事譬如
一杯酒分作千度澗吟喉人言貧飲不盡醉此中甘味難與他

人酬我聞古盲人其心周六虛朗朗析千載照灼天地初我今
歲月只向混沌盡悔不少時多讀書

初夏與客偶飲談次有感

浮生細數尙多愁湖海閒遨竟白頭壯士少狂期馬革釣翁老
懶脫羊裘文章名亦隨天付身世因宜與酒謀多少解人搖落
盡閒身何用數登樓

秋原

秋原暮色獨眺望霜蘆風葉縵遠天安得小村流水外自乘新
月鋤蒼煙

刈蘆

卷四 附游草

三

晴湖落日沙石明霜蘆遠近西風聲老漁呼兒收釣具船頭坐
看溪月生炊煙漫漫川樹平鷺鷥飛雪下前汀吾愛此景踰仙
瀛吟情爛漫沿溪行平橋野徑接山塍人家茅舍出煙垌門前
流水月晶晶吾愛此廬勝園亭老農叱犢歸罷耕子婦笑語羅
盆罌濁酒豆飯怡衰齡吾謂此味過鱸烹天青月朗掩山扃應
時作息飽太平吾羨此輩洵淳氓靜中天色如鏡清耳目開豁
視聽瑩吾於此懷難忘情半生遊展窮滄溟如今髮白扶杖與
見月夜起停前楹樂情日與年歲更天高海濶得此生一室萬
古有吾朋眼前獨詠且獨聽幾年病卧掩柴荆大衢車馬飛塵
驚花時致客酒如澠名香勝花列娉婷吾謂好夢不如醒秋高

木落步南城遠寺日夕昏鐘鳴野人刈蘆煙冥冥坐憶湖上秋月晴

示友

名士如名山軒車時來遊自非林泉性鮮能終日留豈不愛清華冰雪易爲愁性習本自異慕思良亦浮所眷非素懷羣疑生嘲啁是洵神仙山何無金玉樓以此求真賞所以先林邱吾願山中士氣與冰雪道自愛白雲睡非薄車馬儔

十詩九言月

陶翁求澹泊靜與松菊隣一生味在淡飲酒乃知醇予亦寡所營蕭然如翁貧十詩九言月老此山水身一生味在閒卧覺天

卷四 田游草

三

地春朗朗惟此月可與出風塵非離人間處但識形影真願以所愛月貽贈無懷民月但求之天酒猶聽之人使翁今猶在吾言當弗噴

戲作靖節耘耔圖

畢竟潯陽野老家田園蕪盡尙桑麻我無一笏桑麻地何況閒庭種菊花

思釣船

春山臨岸杏花開水面圓漪細雨來小艇泛收煙景入名園何事飮池臺

登高倒用去年吳氏席間韻

仰天大笑青天底自我能游歲歲閒千古誰從杯酒老一秋心
在菊花間身憑造物分來日看盡前人詩內山天笑窮生有閒
福衰年能自息閒關

上巳看八灌園

世味老未厭入春殊有情以世無窮年寓吾有涯生年衰苦疾
卧天亦風雨并一春九十日掩關過清明病起步城隅遠風飛
殘英樓臺有花處門巷多冠纓羸軀倦酬揖攜杖田間行大地
環溪山天碧浮雲清野廬葦爲垣榆柳初葉青門前細流轉樹
根桔槔鳴老圃勤於農祈雨勝祈晴今年土膏潤幾日疏甲盈
遊屐苦風雨農疇含笑耕力作仍和歌倦息相遞更世間惟汝

卷四 別游草

三

腹不愧脫粟撐吾生雖粗糲豈爲無口罍何心花前醉觀此隴
上醒請爲耒耜歌謹作擊壤聲隨風入簫管花前停杯聽

自伯昂書齋中歸戲寄

靜坐百花底無人知客來欲憑花報信故折海棠回

秋晴

衰翁日日有佳懷况值高秋上燕臺采菊詩因無酒得愛山心
自讀書來義皇人豈同枯木狂簡情須異溼灰稿卧蓬蒿真自
貴生能無用便爲材

東坡生日冬寒無花移作子由生日則佳矣同人遂謀以
其日集飲戲爲一絕

二蘇同是凌寒客世上鶯花不當春若論生辰坡故好梅花一種足精神

同叔生日集鴻生家客以琴聲趣詩書七古一章曲未終
主人復乞詩作一律

老翁白首坐掀髯名士分儕儼列仙涼父彈琴催製曲洛生指
畫索題篇花前剩墨八千首杯畔狂名四十年若道人間風月
味此生差不遜前賢

屢哭舊交入春已數次矣老境所不堪也

衰年岌岌向頽波泉下人傷鬢未皤眼底坐看知者盡夢中翻
覺故人多遺書黯淡名山塚灑酒蒼茫豪士歌此味今如殘蠟

炬寸心灰盡淚滂沱

春去

牆角微風墮棟花與春分袂總天涯簷枝漸見醜酸實池草初
生鼓吹蛙大好光陰閒杖履太平村巷盡桑麻老人究比花強
健竚立殘紅看種瓜

喜雨

農夫數雨點勝量千斛珠平疇際天色削出青珊瑚一珠飽一
家千里同日娛人耕得時饁牛耕識新芻造化有全功百物無
彫枯山原茁瓜豆水澤長荷蒲貧園荷莧榮富園花木蘇有叟
無田耕扶杖觀菑畲年豐多眉壽閭巷聞讀書是知百物生總

賴田中夫力勤答歲功餘漿聊實壺聖人重農稼農樂羣情紆
老天豈不然一雨澤萬區雨師問農父旣雨復何須農父向天
謝苟飽不願餘但願生子孫人人能荷鋤荷鋤知
帝力得食審有無世間廚中炊計畝僅得舖豪食糜邱山儉食
困錙銖千人萬人歡一人兩人殊花前少年客錦障香油車富
田不須耕雨游苦沾濡道旁無鋤人求殮阻潦塗

野佇

落日人煙遠蕭蕭江上看野塗歸犢盡天氣正初寒

遊廢寺見故人題句

事去不如夢生浮各有涯階閒風聚葉沼淺鳥書沙往蹟仍蘭

卷四 卅游草

三

若高秋見菊花悠然身後淚薜壁數行斜

林阜間集詩稿卷之五

會稽潘 詒少白

古今體詩卷五

遊戲餘草

此皆雜題無草諸友為錄作一帙亦刪取六十首

見豆花題壁

閒裏光陰旋磨迴階前種豆見花開病翁只覓閒詩興人道先生學圃來

客欲去欄前枯籐題壁

秋盡霜巖蘿薜乾尙餘枯翠拂闌干主人已約欄前月留待寒宵挂雪看

戲作畫

卷五 遊戲餘草

老翁龍鍾坐驢背時聞笠下吟詩聲可惜鑑湖春水外十年詩舫空月明

為王藕塘侍御作梅

眼昏久廢亂柴皴索畫多於問字人擬作梅花千百幅逢人都贈一枝春

畫梅為陳通議

畫梅心不與梅期要似孤山處士詩春意忽如我意出令人各憶看梅時

畫梅為程勤齋

曉寒凍雀啄簷牙千里殘冬客裏家活火地爐村釀酒雪中只

好畫梅花

顧南雅太史索看畫梅

不信人間有此梅化身多少一般開分明自我豪尖出都道從前看過來

姚伯昂學士看畫梅

風雪尋春病不支小牕晴日頗相宜杯前坐憶東軒下正是梅花欲綻時

畫梅爲梅伯言

唐突仙人冰雪姿生礬紙澁墨光癡細看尙有春風意却似西施藍縷時

卷五 游戲餘草

畫梅爲何子貞兄弟

畫成竟沒題詩處挨着寒枝寫便佳春後枝長穿字過譬如花下掛詩牌

畫梅爲劉申受

擬將一片崑山玉刻作離奇老樹杈袍笏終嫌風致別元章不敢拜梅花

畫文餘老梅贈陳其山

如輪老幹更清溫壺外春風無此根略綴疏花透元氣昂然白玉琢崑崙

爲春海司農畫梅

沈檀香炙武夷茶繞樹吟芳到月斜消盡人間清福未玉壺冰
水畫梅花

畫梅爲吳竹如

寒冰深雪迸英華只有芳蘭並茁芽同是靈均眞色相楚騷偏
不識梅花

人索梅四幅畫一幅應之

和靖一生詩幾句居然品格與花支若教漫寫三千首未必不
同桃李枝

爲鴻生畫梅不佳

聽琴談道與看山妙在無心得趣間有意畫梅機便劣請君撫

掌并詩刪

次日復乞畫梅實邀飲也爲作一幅

知君期我共深盃道是秋閒乞畫梅便寫一枝添酒話持螯誰
對此花來

題鄰牆

桃李靜欲語鳥聲喧朝輝有人持酒未花片隔牆飛

移寓書舊院壁

墻陰十步蒼苔地都是先生手種花爲語踏莎人記取紫葵紅
蓼正初芽

竟醉醒後題壁

生故不解飲古亦鮮飲人頽唐竹林逸徒以酣其身高言頌酒
德以醉爲全真優游墮志氣顛倒淪精神其飲能幾何含盃氣
已醺譬言介士勇遇敵輒紛紜不飲坐其旁竊爲病者呻糟邱
風霧漫洪雨如注輪不知古醉鄉春風常綰縵吾量怯一蕉日
飯不設樽脫粟習知味若有醒者存秋風吹南園纖月嵌天垠
吟嘯興漸逸濁沽來前村頽然舉一杯殊覺公瑾醇得句再三
進耳目異見聞夢來眉睫間飛揚馳春雲席莎幕脩樹一覺朝
景駭驚起未櫛沐客至來敲門酒痕在衣袖翻墨污鬢唇客視
氣質羸勸我壺佐殮餘醒澁喉舌大笑不能言請看鏡中形一
勺忘其天不飲偶一醉其勢如狂瀾安怪劉伯倫隨車攜墓田

卷五 游戲餘草

四

樹影滿清几松爐烹山泉悠然故味還朗神濡枯顏因吟醉後
失聊自箴慙昏

卧聞

卧聞童子報花開終歲栽花看幾回知我多情是桃李一年一
訪故人來

畫扇

學詩十載磚磨鏡學畫一日竚笑夔每畫必題詩勝畫客來求
畫不求詩

畫梅

人間烟火俱避舍玉骨鼎鼎照塵區不敢爲君多寫照今年此

是第三株

送遠索畫作旅行圖

斗室垂幃如此寒
關山行路雪漫漫
欲知我寄愁心處
挂向高堂素壁看

畫

木落烟江覆斗青
暮鴉飛盡雨冥冥
客情一樣無端緒
姑射山樓憶洞庭

東西南北浪游人
天遠長塗一閱塵
頗憶江南秋水寺
西風斜日卸鞞茵

畫苦吟圖

卷五 游戲餘草

五

少時厭見諸老輩
咍筆吮墨索枯思
書生例有擁鼻債
如今吾輩也吟詩

畫菊

碧雲瀉秋風芳菲上
欄干年年種菊花
分與秋風看

畫

大漠秋雲起人煙
露戍樓遠塗繞斜日
城郭似并州

又

風月胷中迸一堆
芒屨陟歷盡崔嵬
杯前談到行遊處
袖裏青山抖出來

題巴東驛中桃花

十日春陰鏡有苔驛門雨歇喜含杯巡簷細數桃花盡明日天晴無數開

苦恨無根白鼻駒待君開盛又天涯暖風晴日清明路塵笠吟鞭餞柳花

持杯鄭重酌花神陟歷千山晤好春寄語後來鞍馬客者曾遇着賞花人

雪中寄孟秋圃

貧廬鮮竹樹佳日常出游每當閒寂晨賴有素心儔高言契至理朗抱鑒羣流任真各不厭澹對如清秋東西共里門步履可相投有時坐佳月聽盡寒更籌此中有氣誼妙合非有求茲辰寒擁褐深雪泥行斲柴門晝轉永簷雀饑啁啾豈無車馬人老病倦披裘小室餘凍火烹茶已成漚起檢架中書陶杜相唱酬此味良不淺爐聲風颼颼安得屐笠至舉杯共清謳

姚伯昂宮詹喜栽植坐卧處皆奇花北地所無者亦致之

予偶至其齋中值其訪予未歸題詩几上

秋花合園牖入門簷日香香風轉芳序素節儼春陽胡蝶爲主人引客到深堂堂除隨花轉羣艷環四廊奇姿依高座下乘皆負牆或如循階行當檻露清揚菊花獨傲睨北窻共羲皇旁有紅海棠其根聞鳴蟻始知人力勤可以回風霜主人日何爲琴硯置一牀讀書食無肉鑄花欲爲糧抱甕朝日出荷鋤秋月涼

誰能知此意其願如耕桑茫茫視百生慨心長使芳以此蓄雨露必致羣物穰我坐千花中四顧如望洋久吟童子至薪松瀟雲漿據梧吸清芬白日下疏篁作詩誼橫琴期君麇鳳凰

書旅壁

九月風塗笠漸輕倦鞍日日計行程暮烟一簇近亭路寒葉萬家秋雨聲野酌不堪評酒價獨吟無處問山名馬頭喜有停驂處聞道前郵是洛城

乙未清明爲人書幅

蕭條山館動新烟春絮春風擲少年豆蔻濃香薰寶鼎杏花微雨濕銀鞦病軀尙買書千卷新歲又添詩十篇老去春如殘夜

夢未醒且復擬游仙

丙午清明爲人書幅

無花無酒過清明陟歷春風又一程北牖高眠因皓首東山閒屐愧蒼生讀書正類加餐飯閱歲聊爲馭氣行猶有看山緣未了不知暇日幾餘贏

意行漫題

閒日去悠悠閒人許白頭吟隨春意漫步爲水聲留野暖生虛靄天青見遠樓人間有幾屐原不贈公侯

記夢

老人看山春又至扶杖林壑面山喟古今同音共一字千載芳

情塞天地生當幾載逢幾人往者如風追無翅畫簾當軒聚落花好春夢挈知音醉古人今人猶具在我固少年不意觴籌談詠各分朋樓外溪山照杯翠不是西湖定鑑湖人似河洲暮春袂遏空遠籟非絲竹匝座清芬集蘭蕙斲琴沿樹取百衲相鶴開籠試一唳或言吾儕當不死游息山中足自慰我時豪吟氣復驚喜向花前得聞歲傳道花神載花至四座停杯皆倒屣忽聞鐸聲呼夢轉語燕啄簷向人睇起來捫髮殊自笑纔去南柯鬢遽瘁菸菸一飯復攜笻何處林臯卽吾契我自天涯收屐後夢境和平謝瓌麗勝日無儕常獨吟靜裏光陰殊有味古人今人并來者芬芳要在青天內同心何必盡相識自古定應有此輩是鄉佳遨一吐氣足償十年掩關睡諸君座上定跂訝怪我無辭入花邁豈知我醒遊正樂春風大好人間世孰能持酒約羣公綠萸新杏花之寺

畫楊柳

十年揮筆作枯叢消受冰霜雨雪風改換筆腸寫楊柳年年飛絮又西東

畫扇

十月西風雪滿簷呵冰畫扇作新荷畫成剛好收藏去扇樣年來又若何

畫驢

騎驢最要用全力暴虎馮河無此難遠路十年知馭劣倩人牽
走莫加鞭

摹關山風雪

作詩不解掠人美作畫有時摹古人撫得郭熙小三昧大家來
看捧心顰

畫曉景

朝日初出烟濛濛水流泱泱山童童我能爲君談太古羲皇前
人三日聾

對村酒題壁

瓦礫爆炭濕生煙風雨相依倍藹然近與淡交殊漠漠偶承芳

卷五 游戲餘草

九

訊甚翩翩是才大似周公瑾餘味猶過崔伯淵自古塵途真賞
在采薪家故有嬋娟

題道旁小圃

風絮池亭燕子飛柳梢微雨濕人衣解鞍久坐無人問起折花
枝上馬歸

畫馬

伯樂自言能相馬驂騮駮耳俱羈羈春風苜蓿紫玉頰我只平
沙淺草眠

畫扇

畫無師法喜觚稜直點橫叉鬼髮髻攜向案頭須有用塗餳便

可獵蒼蠅

旅宿題壁

涼天寥落壓蓬廬擬爲冰霜憇蹇驢坐寐忽醒月皎皎行吟時
聽角烏烏茅簷霜白風推幕竹舍窗紅人讀書此夜夢魂殊好
在雞鳴擁被聽行車

畫蜀道

秋花秋樹擁金蓉浮翠浮藍無數重是我當時訪虛靜紋江玉
景聽晨鐘

白草市經白湖

秋水三萬餘頃極天一碧無紋人間那得許地安放日月風雲

卷五 游戲餘草

十

我自峽江入蜀千山萬山無縫造化煞費布置此地乃爾閒空
俗塵望洋避舍朗朗玉奩無罅却有一舟一月相與消磨清夜
胸中吞九雲夢海上有三神山剗却那須芥蒂人間何等寬閒
題田家

初暑日亭午鳥聲飛復還社祠衫笠聚綠樹桔槔閒女課繅絲
急兒書夾註刪欲知淳茂俗呼犢遍青山

春去

花事如兒戲悲歡其謂何好春容易過醉日不嫌多
花片剩無多判教竟夕歌還春詩債畢便好詠新荷

旅店坊畫梅間燕子

燕子已歸梅未開
梅花落盡燕方回
誰將懊惱詩腸意
補出天公恨事來

杏花開日領春光
蝶夢鶯魂都帶香
看到菊花秋意動
便教鴻鵠管風霜

萬里游

詒少喜爲長韻詩興來快意而已詩無取也故友姚翁昔爲定詩錄前後萬里游後篇爲一友所失今獨存此不忍刪去言詩者多以無體疑之竊不謂然蓋詩有四體自古及今固未嘗變至格調篇句聲律之法則屢創而屢變今之律絕排偶并騷賦詞曲皆三百時所無有

卷五 游戲餘草

十一

者然體固無戾也若只論長短則世有數百韻詩已歷千載或廣其韻謂爲無體恐未然矣譬如書有六體自蟲魚篆隸至今行楷體固具在倘於波戈橫直之外思創一法原非智者不能若只論大小則一豎一點盡二丈絹亦惟其力所能爲而已故特存此首以備吾集中之一體原詩千四百韻今刪去若干韻亦以稍稱近時所有之體云爾

江南泉石國秋暑九十刻夢醒天地間萬古同默默古人盡何往陳編盈我側結繩既有書吾今始相識日月轉滄海照人紅顏良造物貽我情愛山如愛色兩眸無常青看山有餘力偶見

輒相憐不見輒相憶二十束芒屨放情隨冥鴻吟眺狂懶窮搏
弄癡兀侗年華委青鬢壯心銷飛蓬竊喜所見山都似金芙蓉
會稽直東海寬閒際鴻蒙秋飈吹眼光八極舒清風浮雲霽黿
背望見蓬萊東停杯時塞裳飄颻躡輕虹醉醒弱水遠含豪語
秋蟲江源近崑崙其山高無極濫觴已萬里岷峨峙其側生得
汗漫游似猶愈博奕時惟九月初枯荷隕細葭新霜洗山面顧
盼揚且哲扁舟下山陰暮聞柯亭笛星河羅廣野靜露時一滴
蓼岸草氣香暗蛩厲涼續旅睡得清夢燭炮風浙浙曉日渡錢
塘秋潮漲海門揮之不肯却一葦搏鵬鷗吾硯如瀛壺其流浸
天根河伯庶觀瀾無然靜心魄聰耳苦牛鬥不必聞霹靂兩儀

卷五 游戲餘草

七

運恬熙如人處偷寂九萬扶搖風神氣自寥閼呼吸偶高下物
聽駭驕晷龐龐海鯨鼉耀耀騎士鎬赫赭英烈神漿酒有餘憾
粉堊燦龍蛇鬼偶紛角踢細儒不肯瘖九淵酷羅織子胥殉國
死怒氣何橫激千年怨蠡種波及浮江艦不聞三閭淚濺濕衡
陽壁人間西子湖倩盼照乾坤玉質長不老四時春風温修黛
環兩崖秀色殊可餐歲歲人種花於今多名園濃碧澄秋蟾可
以瑩琴樽鶯燕辭欲遠蝴蝶猶紛翻念爾雙蛺翅好夢何時旣
莊生逍遙去秋露漫天地平生艷冶夢風味亦殊類三百六十
寺百六十度醉東風役形影勾管一湖翠吟課析花鬚須彌其
餘事美人問我名中流笑聲碎遙指紅海棠借我青絲騎好山

不肯住何處覓邱壑臨流別施媵粉黛盡糟粕無地得栽梅有
船不載鶴南高北高峯對立語我錯綠楊棠栢市紅葉吳興郭
蓬窗間坐卧時整幽尋屨一曲兩曲山三船五船泊青青秋江
菱愁紅露前落江塘白鷺絲與我遙唯諾長虹跨巨區秋水清
可釣風雲月露星和盤得所托天地故空曠太古常落窳鯁晒
滄溟隘蟻駭堂坳廓寬窄信兩皆道心生虛竅神禹奠九州八
年勤荒度後人閉門坐讀書求垠塢自謂盡萬卷論述終膚膜
班韋注三江令人廢書噓玉奩覆青甌柔櫓前又却銀波低昂
去布帆搖綽綽渙渙見沮洳青青近蒲蕩水村殘照濶遠樹輕
烟約誰張漁具圖黃蘆映杯杓仙鬢窺明鏡玉影長青迴立脚

卷五 游戲餘草

三

滄溟中顧盼洵雄哉人傳林屋洞諸仙中徘徊束火求金堂幾
爲山靈哈曲竇不容肘觸手皆灰埃水聲滴暗乳指跡印壁煤
前人誰到此興盡猶遲回振衣莫釐罔舒我長風懷始覺眼中
山縹緲多樓臺雲霞皎碧天萬戶臨流開草木有殊致魚鳥俱
無猜夜半泛銀河清光繞杯轉虛明析萬影秋聲與天遠天上
今何夕姮娥去不返濯手明月上碧影流渙散永夕誰與同一
觴自傾偃似聞黃姑歎東海今清淺江城聞啼烏月落姑蘇城
城頭旌旆色霞起扶桑晴碧雲颺珠簾高樓倚太清吳越何紛
紜來爲西施名霸圖一轉燭千載思娉婷紅顏如夜光照人萬
目矇屈巫怒興吳種蠡銷其兵娥眉力拔山於世非虛生世間

兒女鬢伸伸在膠漆濛濛紅錦窗靄靄多清瑟七里珠幔路花
氣薰佛律醉倒陶八八喚起殷七七胥臺一坏土耕犢呼叱叱
自古蝸角爭不當一捫虱夜半楓橋樹槁葉舞啣啣霜寒漁火
遠人語舟檣密舊聞寒山寺雲水稱幽逸奈何綺半肩亦對金
夾膝冥心過華好耳目掃蕪駭靜燕鷗斑細剝燕支角夜寒
節序深衣重肩肘覺吟味入癡腔茶香嗽榜棹闌門東高瀨輕
舟如投梭迴旋澎湃中篷柁翻風荷舟人齒齟齬棹發不能歌
區區數尺浪眩望成嗟哦因念馭風者蓬瀛何當過昔人運匠
心刊鑿鬢爲皤後人拓美利如播春農禾區畫淵岳勢人功到
滄波地初一全石圓寶聳陂陀天體渾無間空中如叵羅諸氣

卷五 游戲餘草

十四

釋爲水下極先盈科浮地出其半如瓜在洪渦稜觚兆山原汁
液成江河物久必敝剝造物不敢訶人言地懸空日月相戛磨
下物皆倒生其理恐或訛堅軟蠕蠢冗真體爲翳翁如松柏之
皮栗栗復糜糜如掌足之膚繭繭復糝糝如銅鐵之繡塗塗復
垢垢沙者石之磷膏者土之朽精氣盪萎華洩洩自牝牡胎卵
化濕生指認相誰某衍漫之膚質非大地初有本真掩未盡稜
鐫蠹峯阜爲巉嶠礧確爲巒砢嶒嶒爲海內諸山爲沃焦壺瀛
萬山同一根底極仍礎崢相與載浮土如鏡不可瑩吾知太古
山當與青天摩高者日靡下埃垢日益多一年靡分寸百年當
如何人生苦倏忽未見初爛柯自今更萬劫埋沒至岷嶓吾觀

天下山其土皆丹渥丹者爛石色滓積則瀧涿百塵奔下濕隨
流填飄邈扶桑必中陸溟解可盥濯吾生幸尙早猶得覩山岳
兩大本一器中隙覺頃洞蒼蒼太空體近視亦龍窈七曜隨氣
旋氣動天不動管中所得窺浮氣之所拱足下所得履浮土之
所擁一指測蒼茫浮液之所湧萬仞駭巉浮稜之所聳眞體
固有在仙佛皆懵懂滄海漂一粟粟固有根蒂人處天地內孰
見天地外外如天地者何啻恒河壘人心生智慧智慧離素樸
蚌中珠是病眞宰怨雕琢聖人非不知人事固已然萬動快飲
啄大化甘雕刊補苴而曲成所以全其天眇眇七尺軀於焉食
與眠興發杯酒後時演無稽禪南國近新豐酒價高岌岌大川

卷五 游戲餘草

五

橫我前金焦秀可挹檣頭望樓觀新雨蓮花溢一杯凌神霄諸
景攬已集長廊蛇擊中廣構蟻戴粒濛濛吸江亭烟中遠如笠
憐汝兩邱壑力挽波靡習稜嶒瘦骨與我並肩立曉霧月鉤
下秋吹水花急綠槍品泉味翠杓灑松汁搔首明鏡裏仙福清
可汲老僧橘中叟卧向蒲團蟄人間只滄海山外非所悉白舫
移足去紅塵盆眸入雷師鼓秋濤風雨奮嚆靈江雲低至岸海
氣連城濕卓哉郭景純知命不肯訥小數諒節義鬼誕非撓滑
如何青雲根左顧凌波鷗千年留葬書聚疑及枯骨生格豹虎
怒死葬鼉窟愛奇而奇之投之於滂渤長風排高檣孤蓬負
霜發揚州好花柳夢破去已猝朝曦浴海曙岷流浸天秋銀山

排兩船壯矣烟波遊達磨從東來爪痕爲誰留泛泛一四大叩
山相與浮魏騎飲瓜步投鞭斷江流株及橫槩賦備自傳詩郵
大帆界天起落日見平磧山家草木花江市魚蝦舶南船北船
纜東行西行屐羅羅疏柳外幽幽謝敷宅夕陽步深巷書聲出
林越習氣未盡除合掌爲一拍幽徑叢竹亂廢圃蕪穰積黃葉
露牛羊清潭數魴鯽燦燦秋菊花英英露中摘主人不可見粉
堵新蟾夕竿檣蠹沙尾無萬無根客我言遠遊好公等負何癖
愁浪復愁風春閨綠苔迹篷底炊梁熟頽然進歡伯故山有白
雲萬戶未擬易茅簷開竹樹清風布鴈鶩萬里行未休松影栖
鶴隻江左風沈數金陵繁華隕秋水與春華爭一局六朝

卷五 游戲餘草

六

擾攘際農餉不暇粟千戶負箭耕羣仙送春自揮兵塵尾扇匡
世雞聲蹴捫虱堪令僕錢癖殊不俗當時九品士大約高岸谷
簿書蠹者緣金粉仙者福流風及數世高浪駕芳郁可憐裁伯
墓春鋤有荒蓐舟人賽風至白鷺催轉轂三山不得泊交臂失
蛾綠揚帆過采石月照黃金麴高吟昂瘦影青笠廣過幅碧雲
起平沙長天蓋風菽浪聲駭潛犀帆勢捩霞鷺蘭撓夏雙翠吳
波侑千斛幽尋孤劔塚始見九華麓紺黛繪晴空玉人倚寒馥
流落逢花醉愁心泛杯綠白璧刻秋光千年照清旭後來花柳
筆徒碎春機穀齊山九郎神過者紛莫祝文人一何厲暗鳴鼓
水族五載遊皖江興會無餘蓄紅箋權詩稅綠綺破愁鷓見山

不覺遠孤往常信宿夜蔭古叢卧曉接飛泉沐夢與山鬼歌行
見於菟伏入門僮僕笑棘刺滿履服覓句未暇殮吟笑時仰屋
練潭西畔路釣臺多修竹重陽桑落酷寒食桃花粥一月數日
醒襟袖生白醜重登大觀亭舊題不堪讀網蟲懸槁蟻泥窠掠
蝙蝠旅迹本轉篷吾道猶枯木故人攜酒至燃松烹秋菊談意
渺莊騷吟情塵頗牧斜日池口水輕紋漾秋霞施聲號自語去
去不覺賒馬當靜無風鳴榔起烟艇紅欄約孤嶼綠蘿垂鬢髻
彭澤居柴桑後人猶相誇栗里在匡阜人指蒼蒼葭吾愛此翁
居故近桃源家遊覽異裊展名理惟桑麻嗜酒好讀書信天爲
之涯後人遊武陵乃訪安期瓜遠遠小孤山啞啞盤飛鴉天水

卷五 游戲餘草

七

濃綠坳湧出孤蓮花晚風颺鐘聲催我繫枯槎上流下流際兀
立支溯澗寺樓倒天鏡艸樹寫空碧四面捫蒼瓊仰步墮風幘
夫人帝何女安濟馴水德遠和湘靈歌靜聽天孫織何物澎浪
磯一水盈脈脈篙師說廬山唾壺擊爲噉業掛一縷絲錯鑄數
州鐵我昔有異夢非憶亦非謾殘月雞未唱夜景冰壺寒淨魄
隨月光清影溯流瀾奇峯墜天肘斗下銀瀑湍世路未經遊此
爲何處山云是五老峯宛似曾往還縹緲舊路徑歲久多殊端
揮手上層霞秋叢紅絲纈虛壑鳴遠籟草香播幽烈瞿然聞磬
欬石扇碎匄徹有僧華其顛頭角一峯凸袖影障空起迎面天
風洌懍焉記生世千劫渾淪裂如憶已忘書脫口出喉舌如見

遺墮器照眼忽一瞥曾與五逸士橋居務芳潔其名每前聞遺
編洵可悅下山各千載蒼茫自工拙蟻鼻缺大阿熊耳齊鞬紕
久客歸故鄉門徑心所諳溪山有故墅尙指黃茅菴門前松竹
地僧來正佛龕別時各有懷臨歧握手談贈我不了義攜入塵
中衆塵味酣如醪中人如眠蠶安得醒酒石自今豁沉酣老僧
顧微笑不語不嗔喝揮塵別我去一跌滄海滅花影淡欲稀庭
樹啼鳥聒我時年十四意氣不可遏如花初放蕊世味未馨辣
老莊與仙佛交戰相傾奪二十棄儒冠尋山荷簑褐每攜隻影
遊時近曇花鉢文魔驅孔方禪味縛菩薩空塵長空穗六丁不
可拔如此近十年妄念猶潑潑而今好眸子漸對烟霏豁常覺

卷五 游戲餘草

六

天地寬方信夢寐刺兩儀散化機充溢游絲末人心具天地人
事極毛髮百年雖云暫寸刻今古括弩矢固去物適用須羽箭
聖賢敦初受大聲正嘈囋有生盡生事無累乃爲達靜氣憶少
時妄勝殊可悲夢想乃至此豈復容評譏振衣入山翠孤影隨
岡巒濂溪謁古賢百塵息風湍古道挂中天正直非曠阮惟彼
曠阮人望之如緣竿橫目塞天地數人爲其難出門見山色萬
籟徒聾喧昔人詩酒處時復一倚欄金霞雲鶴帳鐘石久亦利
東林始照覺慧遠流其源虎溪五尺澗聲壓默陀垣豈非衆詩
人爲之樹旌旆羲皇一以醉翰墨遂不乾銀鈎時神運斑帙餘
瑤鑄名流文字心每思香火緣詎知香火力都由高吟權董子

何爲者投蛇諸天歡斬人亦人相正眼區以分西林共一山衆
木紛檀欒微塵漲河沙願海聯弟昆山中雁門市金地非寰間
垂老懷故鄉胥作善慧觀所以參寥輩衣鉢在彈冠嗽齒谷簾
水洗耳卓錫泉長川收逝影存者以人傳好山佳可遊愜意輒
孤往名山如名士時復得清賞陰晴昏曉態露霧雲嵐象奇峯
怪石色幽鳥鳴蟲響足以辟風塵去眼千百丈仙佛鑿虛空怪
奇相依仿亦增猿鶴趣却累山溪罔返舟琵琶亭管絃噪霜日
婆娑中聖人山秀杯底汨詞家溺頽放舉動多酖軼夜半隣船
婦萬喚遮面出靜女曠古艷何恨娥眉嫉一把老婢淚總緣青
衫黜開帆赤沙湖日晚望富池桓桓吳折衝躍琰懾魑魍劉岳

卷五 游戲餘章

九

揚其光旌崇及閨闈二十爲大將丈夫固自爲建安漢壽祠儼
對吳軍麾各盡所事懷實茂揚芳蕤南風西塞路白鷺漁父詞
蘭溪湛濃香巴河漾清漪月上散花洲烟暝迴風磯暮雨烏鴉
點寒浪紅鯨鬣卧聽冬冬鼓永夜悽迴堞五更霽風霧岸遠冰
輪壓淪漣縵金玉浮界青奩貼三山定不遠弱水清可檝濕樹
疏漏日窗潤堪支頰烟帆杳無數都在屏風疊試展魚網繭碎
補鴨頭帖倦思栖清揚間夢到蝴蝶一篇赤壁賦危被南柯蠟
黃州濱大江土風初淹淹仙人淪落處島嶼多青帘太白燦花
格樊川開香奩悠悠三百載朗見眉山髯桂棹擊空明碧江洗
秋蟾遂令名勝價竟合浮圖尖數丈黃草坡高並衡與瀟雪壁

燦玉刻酒味如餳粘烏帽紫裘翁按筇捲風簾南坡翠竹外高樓亦層檐瑣碎奇石供共誌瑤瑜籤當時孤旅人旋磨寄黑甜天令斯坡遭空谷發幽潛名山如名花須得王指拈周郎十萬艘詎能爭臺織後來王與張繪頰庶能添鄂州古夏口石城始吳兒或疑九面峰遠在洞庭隈千里青已了名實或相移正如庚亮樓迴照潯陽陴城端黃鶴山何時仍故基北望漢陽樹石鏡青如坻隱石指純陽乘鶴傳費禕靈耳多空響東華更實之曉日開層雲高軒敞襟期大江流晴波萬里橫前湄世外鸚鵡地千年何當歸東漢當頽波文人多浮菲正平非不才云道則幾希窺豹初得斑歌鳳豈知威無聊對白眸嚶關傾芳葵蒲中

卷五 游鼓餘草

而棘筠安得不速摧呀旁悲弔地秋草驟征駢後生搖筆來袂影振高輩少年易爲娛神彩從風披茂林對紅粧醉眼秋水欲鴛鴦呼鸚鵡勸君酒一卮人生行樂耳莫向隴山飛文人詩酒歡轉盼悲局促昨日鸚鵡雙今日鸚鵡獨明日鸚鵡老杯前翠螺蹙江漢釐南紀波浪逼寒溽北風送雁羣天濶雲沉沉夕陽滿大江逝波無古今我今思岳陽素心鳴玉琴讀書數十年此夕發其音誰能聽此曲古調轉嶮朝發大別山暮見思塘林楚南天色遠江郭明且深昔聞洞庭水高樓此登臨西來六千里始誦杜老吟搖落古所傷引壺聊自斟此翁少壯句吳越應玢璘流傳有顯晦難爲問水濱空教天姥夢高咏無比鄰老病

一孤舟岳南來岸巾浮浮江海夢下筆猶有神坎壈隨地澗風
雅一身親天女櫛晨霞夷光無妍頰鬱鬱南斗傍開豁湖山眞
萬古清曠眼渺際乾坤垠詞賦叢邱山誰能闢荒榛羣山自崖
返樓外一峯起望之如覆斗未足語幽姬巴陵楚天色無此不
爲美良由平曠中一拳見崎嶇登之望大澤乾坤疑無底寒烟
接星漢千里復萬里冥冥廣寒魄遠照海中市六鼇山底睡遠
鐘度秋水人間清曠夢悠悠到無始因思天地初靜蕩如是矣
老僧說空緣長河灌塵耳引觀衆妙相佛者故多技沿鐘過黃
陵暮花沼中泚馮夷婦河伯水神多釵珥湘君湘夫人名傳自
楚芊又云蒼梧淚斑竹今不死人心思舜德聊足當簞簞楚巫

卷五 游戲餘草

三

言似夢難以道里紀明璫蔭桂旗翩來乘赤鯉長雲連鼎澧遠
勢帶荆巫日夕塔子磯酒凍雪片麤僵吟不能寐遙夜付跣跡
烟草望公安江流日南馳沱來自夷陵白水羣鷗嬉渚宮紅酒
旗松滋黃柳枝始見明淥水百丈卧江灘羅國九州渺渺青
玻璃至喜猶名亭浮玉久無碑落帽豈墊巾戎服殊不疲何事
兩山人酌酒猶掀髯荒成叢牛勒壞岸生鳧芷上峽一聲來酒
悶爲解頤昔人好遊山遇險輒回首綠蘿三遊洞因之播詩口
峨峨女士粧誰與江氏婦湧泉躍素鯉淑掩傭春偶東鄰爾雅
臺瑣屑寶敝尋誰能剗高唐增此千仞陡洄洄水聲厲嵌嵌岸
容窄冉冉楚地隘隆隆蜀山關互互天影環岌岌巖峽孽矛盾

强鑿鑿珠璣紛狼籍龍虎赫神變雷電駭輝赤盤詰澁句讀彘
鼎矜斑垢土伯曠嶮角巨靈扇肩蹠跛陀羊角旋稜觚蝟毛磔
立柱支天脚斷嶂破山格高屏豁石面礪牙顏雲額骨骼互撐
拄肢肘奮跳躑呼吸聲應迴眺盼耳目迫麗矣諸好倩心賞於
此劇雨濕庾信宅木落秭歸闔長纜懸片蓬人行在嶙峋百夫
乘厓噪巨絳震斷斷驚眸雖電閃遊膽仍輪囷絕代明妃村其
人美且洵慷慨揚修蛾不共夷光釁東家屈原墓薄命猶佳人
叱嗟兩兒女其聲哀以呻傾河注芳淚出色在風塵茫茫造物
意視世無厠茵採折必芳薰等閒榮蕪蕪修蛾悲芳艷玉筋滿
袖真書生只狂歌弔古聊復輒敲破迢邏槽節之以長欽皇祐

卷五 游戲餘草

三

鑿水險甕城粗可航萬家食水力負戴爲餽糧居者解饑渴行
者自徬徨黃牛不負輓過客拜且望云初佐禹功一方祈雨暘
青牛入函谷憑夢遊高唐渺茫神功內其說孰能詳灘後十二
峰村姑擬姬姜無人賦朝雲聲價久未償巫山微雨霽修黛倚
天長羣峯靚真面神女倩晨粧玉沙一鏡靜瑤草四時芳靈均
厲好修蘭蕙漑心香綺藻激芬流其徒矜儀光踵爲壻城記來
與峰鶴翔雲華自翠水飛符又懷襄聖人刊瀾功誕者且欲攘
綠圖赤圭外紛紛滋譁張天公役百靈鬣袖皆儂儂此豈神女
賦握管所能量所以載道文立言如立防高才逞偉說歧論乃
披猖川谷日夜改青壁徒蒼蒼吾少學綺語妄情亦縈結脂粉

入歡史海市黃金埒嘗恨生也晚佳夢不我挈如今自是經蠟
味俱消滅灘聲作龍吼岡勢如鋒接峰迴象罔迷棹轉夸父捷
山半聞樵蘇藪藪蠶食葉久視見行人其上必仙邑大地入深
秀清懷與舒寫碧天如秋河灣環向東瀉深冬草木綠微雨時
一灑愜心游水鏡危身付飄瓦劍戟格虎牙雷霆轟人鮓黑石
没于魚葉牀不如馬纜斷青竹前柁破黃嵌下萬折行自前蓋
亦天幸也夜半舟人號江漲如山高啼呼雜風雨檣柁下萬艘
沈者入九幽飛纜掛林梢吾舟獨後覆兩舫如桔槔顛簸旋狀
內老石攢錐刀砰然忽瓦裂呼聲寂不囂浮我篷席上隨波翻
白濤枯株忽回流狂跳擲驚揉抱蘿立岫嶼去死不容毛驚定

卷五 游戲餘草

三

仰天笑巖月灼秋毫不知此何地曠望徒良宵鬼物出叢篁猿
狖啼相招我欲跨鴻鵠橫海呼靈黿仙者不可見孤立誰爲曹
朗吟振山谷山鳥羣驚翽寒霜凝濕衣襟袖捲春蕉子影照初
旭江海風飄颻囊襍漂沃盡波及裝詩瓢惜哉壺中酒爛醉魚
蚌蛟總角觀羣書志不在温飽淬療慕洪河頗覺古人好卽之
未有得真悟入幻渺性癖喜爲詩是理異粗曉遠搜浚天淵苦
心亦潦倒兩目長視鼻孤膝危自抱築築蜂鑄蜜諄諄蟻拍膈
旋蟻磨上瘦絲蠶繭中稿常苦古人詩闕塗盡荒唐杳更無未開
徑貽我以獨造廿年四囊句堅苦屢折劫初如金谷園春風吹
華藻繼如漢方士笙鶴銜洲島旣如東方生齟齬雜俚佻今如

枯定禪虛空苦未了太山與秋臺瓦礫皆是道假我數十年終
當不草草所慮石火光忽忽壯將老千載吾不知樂此聊自怡
往者與後來相信當不疑提攜隨形影跋涉不能捨六千日苦
心長風一飄捲有身幸不死讀書終不啞此道何足臧吾宜有
進者怡然捫空腹笑傲殊崢嶸村童怪我奇驚走語父兄勸農
閒小隊遺騎來相迎敬謝白駒惠慨焉抒我誠蜉蝣生世間量
腹進稻秬官廚一粒粟賢者以代耕硜硜在伐檀不足糜餘糞
道人方碧瞳挈我蹠蹠行貽我食氣法數日腹彭亨虜髮無他
異惟覺兩腋輕雲樹十數重望見白帝城故交攜酒至披沙聊
班荆贈我金錯刀凍膠再三傾麻鞋故未破青山還得我詩情

卷五 游賦餘草

五

不嫌險未擬擁書坐古木魚氏邑山幽惟一雲嵐霧晝不開江
聲撼峽門此地天下險帆檣來何頻名利如通津屢涉不言煩
人龍與木偶空山同夕曛古廟有松杉千載留馨薰嘗怪八陣
圖不向荆口軍孤懸三郡地獨捍吳魏氛魏亡則吳寒婚姻猶
孔云當時或未暇遂以致紛紜後此王孟輩翬翬如聚蚊越公
儼亦堂蔓草野火焚落日灑西村猿聲靜夜聞此翁生頽世暮
跡同轉蘋邇迴烽火間所留惟清芬不才亦蓬轉四海皆耕耘
坦途無滯跡方幸我生辰異鄉歲華暮客子游影子山郡畫角
雄勝地笙歌熱燭影照氍毹花香間迷迭居人喜卒歲辛盤演
著操游子不知年書空笑且啞肅肅燈花曉殷殷時序易百年

三萬觴萬觴沾我脣夢覺又一歲過日如積新春回君勿笑鬢
改君勿嗔石城落月柝曙山靄無隙偶憶鄭十八地偏杯酒隔
危徑入千嶂進寸退欲尺石梁駕叢莽清泉流號號樵路如琴
絲失塗向青壁幽樹蔭淥溪水色見羲皇小堂開衡門苔梅倚
古墻主人不相識相將遵微行地爐烹新茶爲我薪栗桑畎田
陽氣早菜花盈山塘拂拂依草蛾粉翅點小黃駘駘客思融栩
栩衣裘揚主人誇山居僕請道故鄉故鄉二三月晴烟熙春陽
鈿影鞦韆架鼓聲蹴踘場碧香浸春波閒綠繫風楊樵溪朝暮
風蘭亭左右觴畫橋夾明鏡魚樂在濠梁好山如畫圖玉人皆
施嬌金丸入芙蓉處處飛鸞鷲一日抵百年秋鬢古無霜公能

從我遊請與同越檣主人搖首笑君行何他方譬如見奇書不
讀云不忘是爲靜者機乃得閒中忙庚辛各求魚臧穀均亡羊
君面一壁老我拋三徑荒易地均有愉隨步春堂堂崑瀑界山
碧高峰掛瀟湘蒼篔接水流玉屑濡我裳清籟瑩道心晚照浮
虛涼石根橫孤桐湯湯來鳳凰傾崖炯星漢猿聲起幽蔓日入
羣動作月黑風漫漫絕壁無徑蹊上有行人歎又聞彈指聲卜
卜下山半青熒空澗炬蟻聚忽萍散澗旁叢蓐亂蓬勃鬱深暗
白光搖曳出時仰時俯瞰如持徑丈布霍霍翻覆玩三生有大
願游目無所憚諸氣盜太虛我豈爾冰炭嵐霧濡草木衫袖沾
枯腕靜趣併睡鄉喉與鼻相喚烏烏拍拍動日出上下且如此

好風景生得幾回看陰崖下孤牒綠蟻繚倦眸昏慵付欹枕世
念俱浮漚風雨聒耳喧暝寒冽衣裘灘險纜力盡水力回萬牛
四顧惟冥蒙舟石怒撐擎下者爲波浪旁者惟山邱篙櫂觸靈
鼈或恐翻十洲大江濯傲骨應勝委渠溝漁家耿燈火炊黍烹
蝦鰕招呼與共飲漿醴羅瓶甌蘆中有窮士勞苦聊唱酬我如
秋吟蝸君是清潭鷗得意江湖中均無營營謀四曰望山轉盤
旋到忠州旣求四賢閣復尋荔支樓四賢不同道善能亮徽猷
陸公聖者徒餘亦幾清修中惟樂天叟瀟灑得名優功業遜齊
輩詞名掩李劉山前空公洞巖碑失蛟蚪碧落珥貂蟬豈及醉
鄉侯放船禹廟下溪壑明且幽星月湧大江題詩回白頭願得

卷五 游戲餘草

五

千日醞消公萬古愁波濤收怒氣山拓展晨望中洲坦長途前
疑接周行峽平餘怪石奇氣尙橫放神工費雕礪怪倔詭模狀
或如大廈覆或如壞道妨或如杈柯枯或如器物傍或如衣裳
纈或如鑪沸漲或如頭角矯或如手足踢或如走而顧或如迎
而向或如卧而起或如立而愴如風捲潮瀾如鐵鏤屏障如蝟
戟拳毛如鏡澈六臟如負如拱揖如趨避如抗如黃鵠孤鶩如
白衣對餉如持挺不擊如憶物忽忘碎如隸篆裂欵如弓繳韞
繚如蕭蟠舞勃如火燦燭變幻極肆誕刻劃非工匠置之好池
館得一已無兩昔在無爲軍有石幔以帳離奇挺空洞中腹嫌
偉壯千載米海岳袍笏尙皮相平生喜織技疊石能坡障頗於

數寸內千里見跌宕皺紋厲瑤鑄明姿媚玉暢險仄或特起迴
抱分下上峰巖奮駭逸坡澤仍敷曠寸土藏林數勺水搖悠颺
有時冥苦思太古爲特創唾吐諸有山排斥到崑閬或得袖中
璧奚啻十明貺竊謂展到處鼎鼎俱不讓天機暢自然對此則
神喪坐卧看不足中流繫空舫潛魚大如犀排捩蹙駭浪圖作
無聲詩得句輒三唱晚風催鼓柁感酌松花釀平沙接頽岸山
準韜廉鍔顛倒禾黍幹層疊簞籜江渚多美砭紅碧快踐踏
晶晶脂頰瑩卷卷女手弱拾之滿懷袖審諦都不惡捉筋屢敲
夏終食猶索摸思其所取材意氣忽磅礴斑斕溪藻間文彩似
灼爍澤不中瑤瑜致不中邱壑璞不中混沌器不中雕鑿譬小

儒文章束之於高閣太冲賦三都蜀都頗蕭條考訂印所聞服
集費錘雕寃苦十六年心香爲之焦名序不如賦竟破羣疑牢
連箱五色箋隻字皆珠瑤羣釵學長袖萬面向空翹真識得幾
人古亦常寥寥吾文學未就脫稿旋即拋自知失鑪鍊多不治
推敲孤癖愛嬉游失學自垂髫漸長尙無成經腹日以枵故書
久不翻光陰如酥消却得曠蕩懷不用芳酒澆平都古仙都怪
妄無人嘲其山如村婦不當金屋嬌或言王與陰五雲隨逍遙
又言陰冥庭黑薄萬鬼憀人生如軸轆俯仰轉榮樵死骨共山
邱隨風一敖嘈名褒與鬼罰漉醕求餘糟當其沈飲時醇醪各
陶陶衆靈默不語九幽乃燔炮長吉玉樓名曼卿蓉城教返真

得卽安名士死亦勞我得聊浪生虛艇信風飄他日如登堂風
月無科條陽晶燭閭浮初花有錫蕭遊騎摩行肩綺縠環饒肴
地獄與天堂隨緣同一窻草色繡遠野農稼動春郊窈窕以尋
壑擔頭有懸匏半酒半是詩來自錢塘潮順風兼小雨低篷若
窺牖濕雲埋重巖得一遺八九澹墨繪天水暗青圍前後彷彿
逸羣馬千百聯纏走石美惜韜奇峰拙喜藏醜江水來西極浩
亦衆流藪合江匯其上黔江環其右餘波入彭水滌河通二酉
曉攜古偏提思向黔州沽水似深玻璃山似青珊瑚路似千結
帶天似九曲珠寸人與豆馬點染金碧圖濯冠接飛泉上有繞
岩呼縹緲問姓字指顧招僮胥舟筏聯縷來江聲排風驅文翁

卷五 游戲餘草

三

立船頭峩冠僕其軀握手道慕思恨隔青天隅君拒賀監招肯
與陶範俱小縣有好山逸人所嬉娛歎息攄衷曲人言良近誣
僕生有游癖野習甘彫枯食肉無骨相珥貂愧頭顱鷗鷺避鳳
凰豈敢盜流譽人棄君獨厚恐人謂公迂篷底羅杯盤醇意濃
於酥僕喜子影遊請君先雙鳧白璧爲景光螺綠爲眉鬚足亂
千山雲身登星斗墟萬古猿鳥地何年始耕鋤日月耀澄輝退
方皆邑閭小市隱浮嵐人聲出松梧紅棧栖白石好花干瓊姝
椿栝萬葉嘯微雨濕琴書十里羊角積弱水漸風車萬仞石華
厓圓木下層虛縣人看山饜高樓眺清曠山谷多心賞日夕忘
形拘雲篆日夜白環山如就梳卧榻倚青蔥庭樹啼猿狙山幽

鳥聲好二月聞鷓鴣佳事隨興起拭衣攬塵祛物華過駒隙人
事歎浮梗不意塵中軀又作花前影十五二十時春來何曾醒
小牀置書處顛倒隨桃杏不知今古遠但識青年永稍壯山水
滋老莊亦並馳天淵入寸塵琴硯就一艇鏡瑩幻影聚水深埃
垢併自得灰濕味擺脫歷鹿境望古每失箸握管懶扛鼎頑如
石不轉散似樗生瘦是非任毀譽甘苦默自省濫觴澆花溪紆
掉摩圍嶺元祐太史公秀色秋岳整一揮氣未降三黜言猶鯁
呻吟睡已穩大死覺亦猛天末綠蔭軒胸濶照中靜成都碧落
土招魂哭哀郢文亦強且矯洞堅直透穎自來筆墨障脫盡紅
翠町美人在江湖同病都非幸我讀焦尾集搦筆始能挺苦心

卷五 游戲餘草

五

欲大叩藉手得寸莛知君大國楚未甘視噲等颺颺貼水荷蘋
開躍青龜新桐展芳標高露晚粧靚落照瑩高風古寺額雲頂
立石如覆屋馳波激鴻滓不覺所處高忽怪衣裳冷夏潦溪潭
渾小漾餘澄鮮稠林排條風悠揚聞鳴蟬氣韻故自佳咏君初
少年年年爲惆悵秋枕不能眠大酉最高峰亘古無人前天風
撼鴻靈危途控急弦陰厓晃倒景紅輪下九淵天河逼青影凜
寒欲重氈五更見日出影過尋丈圓遙天正滄滄飛颺照峰顛
下谷猶甚夜露氣如沃湔層霞騰九霄山脊容一軛草木不復
生滑石摩紫鉛萬象隨步轉下視青藍箋飄颻馭氣動今日果
神仙形影相支拄魂夢互爾汝極峰四無傍氣清見纖縷穹象

果大圓與地際爲宇其根挂八區環青一端緒層雲貼至地寸
黑何方雨遙呼浮世人杳杳不得語笙鶴待不來衣袂飄將舉
後人來此山謂吾已生羽我聞地中高如脊運肢股如四阿大
厦更有建瓴處古來舟車客所見幾何許揮淚上太華憑夢觀
天姥人迹所涉遊奚啻蟄庭戶人心於習見鋪張競奢詡置之
耳目外寂寞偃談塵乃知聲名內千百一標樹載籍碎鐘璜廣
漠瘡鼎呂千古有數人或在無何所攬掌咫尺內愴悽愁下俯
顛跼下碧空巨嶺疊深阻悚神頰毛髮攀躋弊爪距弦月山下
團悠然得林漱糧盡果未實巖洞溜鐘乳亂石逢樵蹊人事有
桑苧齒齒列茅舍厯厯開園圃又作世間人故吾失栩栩山家

晝掩關巖居畏蟲虎盤桓周深險傳怪殷城府刺史奇我狂都
尉脫巾舞疏樾蔭駢騎候吏競鑊鼓立熊伺我影驚逸見羅罟
十方有髮僧層浸盈樽醕山城潔幽樹荷靜不受暑賓朋進統
扇聊爲咏白紵清晨攜影去踽踽躑躅榛莽曰貼九地起千里明
洲渚詢云九面峰碧飮洞庭滸兩望衡岳翠留待歸吟補高崗
無停躅日晚至龍潭水滙辰泐西地接黔巫南短篷隱穹嵌巖
垂青黃柑峽高疑坐井嵐霧霏醱醠震靈壁重山陣雲驅驂驛
衆流忽起立上下渾一函螭龍拏懸厓爪甲鏗鐘鐔目暗崖谷
舞衝雨坐層藍羣舟旋扶搖其人如傾甌隨流翻掌足鬚髮漾
鬢髮舟人皆善沒拍拍出重滄怒我踞高樹得句喜捫簪補船

下石堤萬折供眼備驚巨輕小駭風浪不爲忤故人寄烏絲具
道思把臂水惡石瀨驕切切行踪滯陸離啟十龔名紙麥光賦
請作二酉圖爲寫山前寺石壁萬餘仞臨流怯仰觀半巖有窗
牖橫木疊籠櫃其下乃絕壑千古惟渺企舟人爲我言仙經局
玉笥昔有好奇客長繩向空絕山靈厲咤叱獐狎現陰魅冷颼
拳手足旣下如醉寐是有阿護世莫窮其異我自彭水來所
見藏書二路隔人跡絕怪談縱荒恣古言酉陽書亦類齊諧誌
龔者聽其說瞽者指其地兩儀著文章何與鬼神忌六經範大
化世人只兒戲我作蠹書魚屢食神仙字世間所有書百讀未
知義安用汗牛外更作吾道崇水色近湖湘山禾聳青穗欣思

卷五 游戲餘草

三

探岫嘖恐阻峭山睡高下陟崎嶇長鞦挽短轡溪山不知名無
由考奇秘居人善守拙問之如未至清氣覺天來却快滄洲意
高巖松檜陰幽徑蓬蕪纍玉塵登奇巘芳蕙類茉莉蟲聲動草
間秋意感巾被碧梧曝涼日翻翻欲蕭悴節序浪蹉跎存者可
慨喟用短龜曳塗盜虛羣空翼有懷非完璞不雕終陋器二頃
無負郭一家如脫屣酒債幸樽慳詩名愧辭費種籬苗瓜豆方
塘淹菱芰山村十數屋清瀑喧幽邃水暢鄉行談巖演拽神記
綠蘿裊烟翠嬌鳥珍黃翅前峰與後峰偃僂迭軒輕上石與下
石扶絡恐巔墜逢山隨意觀討古未暇致渝城信天險樓堞凌
霄跋陂竇鏤仙釋風雨立屬員往來飛棹聲健翻凌秋鷺西南

輻輳區樓簾有釵珥新橙秋桂香筠篔相致詒避人顧山笑送
客臨江遲和歌喜欸乃問塗逢嚶屎夜夜好明月知是深秋暨
空香滿冰界鏡裏山川繳借問此佳夕古人昔何爲廿載問月
詞笛裏秋光馳微微楓柏丹漠漠高林萎周遭瀘敘間勝節但
浮寄題糕舊豪管了却黃花事英雄經畧地臺堞餘嵬歸寨卜
猶豆觴樵牧堪兒稚古言瀘水惡瘴厲使人痲宋元諸詩人道
渴未敢味而今鎖江亭清澈過涇渭山川須經用薄瘠回秀氣
馬湖最深處雲樹更清蔚拈碧酌東樓聊爲古人慰夜靜鄰舟
棹穴篷入涼吹攪衣陷高枕追及睡鄉駟汝寒乃求衣我不忍
汝懟一語敬相直無爲良苗誠呼之欲與語驚顧猶惴惴誰謂

卷五 游戲餘草

三

下愚性不足語芳懿沈黎濱嘉陵望見霜峨層三峯赫隆然摩
崖落寒星水石繚萬重天路青冥冥下自白水莊上宿華嚴亭
西繞梅樹堙四窻昏林芘十七雲中髻高者呼欲鷹仙佛喜踵
迹談者因仍仍每指大光相開出崎嶇乘一驥昂首前必有附
尾蠅小現五色石日射波濤礮百盤七寶巖長索搖千鈴刊木
作蹊蹬人面摩峻嶒龍洞七十二法雲無時興一孔出香花供
養十方僧娑羅月窟樹松柏靈鷲形生長高寒中鬱律爲人矜
古雪不熟饑蠕蟲生層冰少見輒爲怪昔諺非妄誦洗心炷香
殿足躡靈鴉騰金橋隨虹藏猶見千百燈僧云遊山客俱及梅
杏青五月佛起蟄雷雨雲霧蒸圓輪繞五色草木皆鮮澄人影

在鏡中各覩心所凝，碎支亦大現。常在二瓦陁，天竺銀色界。萬
山圍一屏，兜羅白玉地。磨瑩無觚稜，一一大法雲。四願難窮微，
愛山來何暮。風巖鳩化鷹，一笑問眉禪。佛乃無全能，鶯燕嬉春
陽。蒲柳悲秋零，誰謂萬法外。總藉造化靈，是知普照光。不若冒
霜螢，又聞諸有相。俱非淨眼經，千劫泥鴻灰。猶作陷木釘，我今
說諸法。聊足窺滄溟，合掌大士前。請解纏身藤，啜茗青蓮閣。神
舉太霞庭，鼇背過立堵。龍門建泓瓠，下界初沆霜。上方已巖凌，
短塔標寺墻。檐鐸戛玎玲，中坐不壞身。石關長不扃，乘化有短
長。木石爭聃齡，飛霞如碾輪。烈風蟠鷺翎，垂澤排銅簷。金獸僵
凌兢，板屋低過艇。定僧默繙經，視我裘蒙茸。垂睫瘖於聽，風面

卷五 遊戲餘草

七

刮起霜危欄，猶獨憑祇園。三百餘極目，但晦暝下山。拭凍屐不
令染，著增山翁勤。勸客花露坼，黃滕舉杯神。氣朗得句孤，抱醒
西南第一樓。萬景嵌綺櫺，遙聽安樂水。玉聲瀉銀瓶，改作方響
泉。不如仍東丁平途，喜幽厰殘山。縱寒眺陵谷，轉涼燠冬暖。猶
席帽，翠木懸清猿。紅湧青神廟，江水秀可挹。魚冷不受釣，眉山
紗縠第。夢想今始到，荒郊蔓風荔。祠宇倚殘照，空庭囿平楚。北
風捲旌纛，老鳳擁雙雛。齊聲揭徽劭，大雛猶高吭。璧價攢吻噪，
文章翼景修。顛撲滋光耀，太阿難正視。知者不同調，愛國每昂
激。希古或銳剝，老作海外遊。肩動來忌媚，托言長不死。晦迹思
壺嶠，此老坎坳值。固亦聰明召，然處太空內。清機獨排真，秀氣

藻大峨身窮愈雄鷲悠悠章呂輩何足容嗟謂酌君一杯酒千
載儼顏貌江東愚懶人行遊喜孤隋少讀栗里詩頗擬蘇門嘯
斷橋捲葺處秋柳如君傲眼前攤萬卷未得羣言要凡世所尤
君吾且無能效惟琴酒詩文類怒罵喜笑鞠通栖枯桐與威禽
同好杯酒弗爲薄聊用杼傾倒野興頻提壺巖陟屢輟棹十九
山寺書涪翁天下妙東西兩山鬼同一絕絃操搖落不改色不
用青蠅弔矮刹莫海眼冷泉浸丹窖纍纍子淵輩墓田禾黍澇
長寐弗復醒鼻頭拽不掉誰能呼公等有酒舉之酌行行近山
原草黑過寒燒遙憐老農苦餉篋相嘉勞勤劬求一飽短髮忘
衰耄吾輩豈能賢故屋猶曰竈但勗加餐飯徒授螿蚶盜豈知

卷五 游戲餘草

五

冰沒髀有人荷鋤趕浪萍輕過節獨酌度虛耗卧聞椒酒觴假
寐已午覺板扉客揭刺古社人投毬鞭梢出截薛馬頭入喧鬧
民氣偷春熙莊術通窮輿車輿載衽服駢闐紛呵導佳人翠羽
鈿壯士綠繡鞞婦事動綵兒戲入紙鷁陸行失潺湲武擔一
小鬢我我成都城隱然如大環蜀江來鳥道青城當其偏東作
最禹甸西隘臨秦關遐方一都會風物熙且閒日月垂爛朗詳
靄融阻艱良宵准上元瑤光正東彎萬燈照絃索綺繡輝爛斑
天吳能鼓歌紫鳳飛聯翩四照蟠桃花玉映洪厓顏佳月暢精
神百戲鬥豪妍大衢緋綠社捻捻東風面銀絲結翠翹隨步金
顛顛雲機流春風鮮質迴皎練音繞三日梁香徹五紋扇柳色

莫愁宅簾影石家院蘭室桂爲梁五白一喝旋綵幄闔修途榮
隄墮環釧神動花念郎耳傾喬萬卷高軒幔畫楣椽燭紅墜晏
寶瑟栖玉鴻瑤筐宿蘭燕文彩嚴馬都風流葛姜絢烘托陽春
輝藻繪玉壺熾貧散得遊福鬼才無仙譴豪狂初非昔驚座我
所擅瑩潔白瓷碗細啜香蠟片盪胸起芬菲掣筆鞭風電飽磨
一斗墨寫盡十丈絹五丁好身手無能舉吾硯榴漿注東海海
涸崑崙抃人生那有愁美酒吾得嚙醉死便作陶殊較馬革便
曠哉蠶叢路渺矣遊子瞰丞相祠前翠錦官城上豔碧雞坊裏
媚黃鵝殼中醖此履萬里來行行會當徧景物未經覩川隰非
登泛古或言之詳前美不敢斂我懷蜀道勝幼喜諸君詩九歌

卷五 游戲餘草

五

開天陞石牛抉嶽叢楊馬沈好風六代隔羈縻艷體間一作清
光諒多遺山川有顯晦佳麗時榮萎唐宋暢詞源詞人盛鼓旗
子昂雄而則老杜雅而韃青蓮風而遠醉翁明而猗坡仙駿而
馳山谷厲而崑石湖婉而修務觀矜而姿餘指不勝屈力皆與
山支悚惛述駭愕淹肆逞離奇嗟余無足竘敢及西江夔身歷
古人言是亦無方師我評所見山一隊紅裙陳越山如處女風
範閑而峻曉日暈疏簾初花照明鏡吳山如名閨簪戴屈羣儁
奕奕談席間神彩左右映淮山如莊媿綠窻整修鬢翻書閒睹
果折花不堪贈楚山如淑嬪荆布自娟瑩簇秀湖湘間江妃鳴
瑤瑾蜀山如奇幘紅粧一劇孟四射必疊雙繡隊旋風勁周流

衆芳國花月爲精魄所見始尋寸所願萬千百脂車歷廣漠航
海玩潮汐生得際

太平可以曠遊適

皇帝熙覆載

萬壽永無斁

卷五

游戲餘草

美

萬壽永無斁

皇帝熙覆載

太平可以曠遊適

衆芳國花月爲精魄所見始尋寸所願萬千百脂車歷廣漠航

海玩潮汐生得際

附存詞草 摘存十四首

會稽潘 謔少白

滿宮花 第一體

晚晴天風又起紅滿綠溪春水小童沽酒不曾歸減却半園桃
李 少年狂吾倦矣剩有耽花滋味年年寒食陡無聊愁醒又
還愁醉

醉太平

空階月明風聲葉聲小庭寂歷門扃知殘宵幾更 孤吟自聽
孤觴自傾醉來倒觸風屏竟無人喚醒

帶人嬌

卷五 附存詞草

七

雨歇天青繞樹花無一片春物了綺羅風換輕車細馬漸新栽
紈扇人世事只好風迴雲轉 每苦情悰挂天如線春歸恨較
青天遠嘗梅煮笋生怕聞絃管今老矣減却閒愁多半

念奴嬌 第四體 餞花

梨花如玉奈桃花如雨李花如雪年去年來偏是我枯情最知
時節把酒臨歧愁心萬片付東風分撥未知來歲相逢何處收
拾 羨君此後行踪向寥天瀛海悠揚飛活我似爾蟲纏病樹
抱住零枝剩葉歲歲傷花朝朝病酒夜夜常思月可憐青鬢而
今多少華髮

小諾臯 問月

明月天涯天涯明月南北東西相識我是君慧影痴神閒魂淨
魄泊盡詩聲酒味花意湖光山色待桂枯蟾老人與俱蟄生梗
雲浮年華影瞥却漸漸愁圓恨缺風味與前差別歎吾老先鬢
白 滄海寥寥涼宵曠曠君亦太空過客見多少得意忘情風
衫露履如我今宵此刻當日何知自惜空悵你世外逍遙獨立
造化無窮吾生有盡靜眼看天天看我終古兩心默默問千載
何人憶

夜飛鵲

話酒

笑醒中似醉醉裏常醒酒星還是何星花前一飲渺然遣此生
元在壺瀛一杯已忘饑渴三杯忘世界一斗忘名人間天上遍
蒼茫兩腋風輕 日飲今惟五合却栩栩神來綽有餘情誰識
是鄉太古長瓶大杓撥盡滄溟登徒好色浪纏綿惱亂娉婷請
三薰三沐同君歸也我詠君聽

摸魚兒

楠詩

太空內琅琅甚物與人作胸中慧豁然迸出秋豪上眞宰也須
憔悴緣底事被風月溪山暗換青春歲深更無寐猶面壁攢眉
捩鬚抱膝不飲長如醉 算從來會幾於中無愧遙遙一線相
繫沉雄簡遠清新瘦各有無窮天地最難會恨往者無言藏個
深深謎渾猜不是孰似釀花蜂融香鑄艷別作一般味

戀繡衾

夜坐

五十年來一餉顛被青天笑我鬢斑生世幾逢圓月入春宵又
看三番 行游正好乾坤濶彼白鷗何似我閒有酒莫辭沉醉
縱豪狂不似當年

虞美人

樓上

閒庭晝靜新陰暗春到梨花澹一杯無緒下踈簾欲往行游何
處雨纖纖 憑欄興味今都換天引愁心遠神仙何術倚高樓
不怕落花流水滿瀛洲

憶真妃

燈畔

淒淒暮雨園亭峭寒生流水落花春去太無情 終日醉終宵
睡有時醒一點一更簷滴怎生聽

太平時

秋初卧作

渺渺風荷貼渚烟水無邊釣絲一卷簪蓬船近神仙日燕北秋
陰飛葉早漸涼天疏簾清篔簹晝常眠已忘筌

如夢令

除夕元旦戲作二首

孤旅如僧居寺饑僕逢年先醉倒缶漚殘醪一歲到頭逢你休
睡休睡我與酒瓶守歲
客至敲門未起道是飲多困睡從此又添年莫枕糟邱昏寐且
未且未我却何嘗真醉

河傳

第八體

餞春

無情流水薄情花片多情客思滿晴空飛似游絲無際根何

處繫 去年鬢色今憔悴春風起春去人如醉問青天乞幾年
花前含杯壁短箋

卷五 附存詞草

四

介甫含杯壁短箋

去至錢色今憔悴春風起春去人如醉問青天乞幾年

姚鏡塘先生原跋

少白先生游京師始與予相識不余愚而辱交之因得悉平生
踪跡與其用意之所存先生少卓犖讀古人書不事舉子業獨
好遊天下奇山水足跡踰數萬里入峽舟敗身僅免守令使人
饋遺之不受也讀書姑射山大吏欲識其面不能致則以計
遇之留數日去與長民者言言愛人與里老言言耕鑿樹畜與
士人言言孝弟忠信尤競競於義利之辨欲使天下之人感務
本節用治禮義以稱國家教養之意無負天地所以生斯人之
心此其志之所存也間爲詩歌閒談超曠絕去世俗筆墨畦徑
游京師上至公卿下至婦孺無不知有潘先生者然其所致力
實不在聲聞間也予既定先生詩因志其人之大致於簡末乙
酉秋日愚弟姚學瑛拜手敬跋

跋

本朝甲寅年... 先生之言... 天下奇山水... 京師... 愚弟... 敬跋



